

昭

代

典

則

代典則卷二十四

賜進士太子少保刑部尚書晉江黃光昇編輯

吳郡陸翀之訂正

書林周曰校刊行

武宗毅皇帝

丙寅正德元年春正月改副都御史楊一清總制三邊軍務兼理馬政

一清疏言陝西各邊延綏城堡據險寧夏甘肅河山阻
隔賊雖侵犯爲患猶淺惟花馬池至靈州一帶地里寬
漫城堡稀疎兵力單弱一或失守虜衆拆牆而入犯我
環慶寇我固原深入我平鳳臨鞏其間漢土雜處倘兵

連揭結內變成因之而作根本動搖誠非細故此所謂膏肓之疾腹心之害也成化初年北虜在套彼時未有邊牆恣肆出入已而得巡撫寧夏都御史徐廷璋修邊牆二百餘里開濬溝塹一道延綏地方邊牆壕塹又得巡撫都御史余子俊修濬完固北虜知不能犯不復入套者二十餘年世平人玩邊備稍疎牆旣日薄溝又日淺弘治十四年大虜由花馬池拆牆而入戕破內郡虜人得志始蔑我邊牆爲不足畏連年擁衆拆入我軍動輒失利寧夏鎮巡屢奏乞築牆濬塹揔督軍務都御史史琳又乞於花馬池肅州設立營衛兵部奏下總制尚書秦紘紘止添修四五小堡及於靖虜至環慶地方挑

邊塹一道七百餘里。自謂可無虜患。弘治十七十八年冬。虜復大舉。仍自花馬池清水營拆牆深入。紘所修邊塹營堡不能捍禦。阻遏攻陷清水營。殘破花馬池。上座宸慮。勅臣經理。臣闇劣歷官陝西有年。虜情邊事頗嘗究心。但腹裏頻年荒旱。倉廩空虛。饋餉不繼。虜賊動號數萬。倏聚忽散。未至而廣徵士馬。則徒費芻糧。既至而調兵應援。則緩不及事。縱使大兵既集。務速則彼或不來。持久則我師先老。恐終無以伐其深入之謀。沮其方張之勢。嘗聞防邊之計。莫危於戰。莫安於守。臣恐坐談不如親見。自慶陽環縣延綏定邊寧夏花馬池興武營直抵靈州。一帶邊牆城堡墩臺。躬親閱視。廣集

衆思兼收羣策參酌損益始有定論其大要有四修濬
墻塹以固邊防增設衛所以壯邊兵經理靈夏以安內
附整飭甯州以遏外侵當務之急莫先於此但陝西財
匱民勞修邊之役人多異議然利害有重輕關係有大
小大事可成則小費不足計遠效可圖則近怨不足恤
此臣區區犬馬一寸之忠也今之河套卽周之朔方漢
之定襄赫連勃勃統萬城也唐張仁愿築三受降城置
烽堠千八百所自是突厥不敢踰山牧馬朔方無寇歲
省費億計減鎮兵數萬受降遠在河外古之舉大事者
未嘗不一勞而後永佚類如此受降據三面之險當千
里之蔽正統以來浸失其險舍受降而衛東勝已失一

面之險。又輟東勝以就延綏。則以一面之地。遮千餘里之衝。遂使河套沃壤。爲虜甌脫。巢穴其中。深山大沙。勢顧在彼。而寧夏外險。反南備河。此陝西北虜之患。所以相尋而莫之能解也。茲欲復守東勝。因河爲固。東接大同。西接寧夏。使河套方千里之地。歸我耕牧。開屯田數百里。用省內運。不然。則陝西用兵。殆無虛日。八郡之人。疲於奔命。民窮盜起。禍將何極。及今將延綏寧夏一帶邊防。設法整飭。賊來有以待之。雖非上計。猶愈於無策。醜虜聞知。或數十年未敢輕犯。我得休養生息。東勝之地。未必終不可復也。世之論邊事者。或專主於戰伐。臣亦非敢忘戰者。方將蒐選官軍。策勵將士。修車馬。備器

械儲糗糧明斥埃。今冬虜賊若復侵犯。謹當督率諸將
恭行天罰。成功在天。臣不敢必。凡所當爲。臣不敢避。今
首以築牆挑塹爲言。宜必增茲多口。但受恩深重。自當
爲國遠圖。今年套內無賊。腹裏有秋。人民稍安。正可有
爲之日。應合經理邊防事宜。條奏伏望聖明俯垂省覽。
下兵部議。勅一清經理。○正德元年。都御史楊一清題。
准靈州大鹽池。增課一萬五千引。小池增三萬引。新舊共
五萬九千三百三十七引。每引納銀二錢五分。及收臥
引銀一錢。共銀二萬七千六十餘兩。送固原慶陽收貯。
買馬之用。及於鳳漢二府。相兼河東鹽課。貨賣疏曰。臣
切惟陝西地方。皆防胡重鎮。軍務所急。莫先於馬政。看

得靈州大小塩池所産塩斤與解池相類不煩人力取之無窮舊例止是招商中納馬匹分給邊鎮騎操後因各邊交互相取多寡不均故有間年開領之例又因中馬勢囑賄通濫收不堪馬匹不得實用故有收價解邊之例畢竟爲馬而設後因放塩弊多奏添副使一員職雖整飭兵備實兼督理塩法近年以來塩馬之制遂廢以此總制尚書秦紘苑馬寺卿車霆先後論奏皆欲增廣行據副使燕忠高崇熙等親詣塩池查勘委有餘饒常課之外雖增十數倍似亦可辦合將大池增一萬五千引小池增三萬引每引止可納銀二錢五分照塩一車以六石爲則外有多餘依律掣拏追問運至固原慶

陽二鹽廠所卸。每引仍照舊收臥引銀一錢通共每引該得銀三錢五分。每年該得銀二萬七千六十餘兩。此外若有餘鹽却依車運所奏就池招人納銀與給引日聽其發賣。倘遇旱澇鹽生不及或邊報緊急鹽路不通除舊額鹽課外。新增鹽課明白除豁不可膠於一定歲歲取盈行鹽地方。許於鳳漢二府通行與河東之鹽相兼發賣兩不礙阻所收鹽引銀兩俱送固原慶陽官庫寄放聽慶陽兵備兼理鹽法副使及固原兵備副使提督稽察每季監理通判督同鹽課司將給過引目放過鹽數造冊開報臣查考如遇各邊缺馬聽臣斟酌通融給發買馬支用不必拘定間年之例如此則與茶馬大

有裨矣。○兵部武選司郎中何孟春奏增靈州鹽課疏曰。靈州鹽課司大小鹽池。自祖宗以來。與茶法並爲各邊馬匹支用。近該總制邊務馬政都御史楊一清於額外奏討鹽引。名商納銀。商賈雲集。近日買馬數目。助益邊方寔多。其轉移區處之宜。臣不能悉竊。以向日馬少。引常有餘。今日引多。鹽不告乏。天地生財。本自無窮。顧人用之何如耳。臣過靈州花馬池。得聞二池之鹽。自來不費人力。煎熬夏秋晴暖。水凝而皚。如雪如霜。隨取隨足。以今觀之。課仍舊額。傷於狹矣。又訪得鞏昌府漳西縣二縣。亦有鹽池。額課御史王愷曾要洮河岷州折銀易馬。其河西鎮番衛鎮夷所。有鹽池而無額課。除鎮鹽

池該驛公用外。鎮番境內外鹽池數多。獨無可資於官者乎。臣愚乞勅楊一清。卽其已效廣爲永圖。前項鹽池若是計引重煩。不如增額爲便。卽行計量。近數年給引之數。斟酌時中之額。於雨暘旱潦之間。制多寡贏縮之節。大約可增至千萬引。鹽旣定。可計課銀。每一百引可得銀二十五兩。商人不問客人士著。納銀二十五兩。得引百通。課引一年。當不下二三萬兩。如遇各邊缺馬。給發買補。鞏昌鎮番地方。鹽池應否。照此定奪。其餘河階狄道魚河等處土鹽。各加禁約。不許興販。致壞課程。敢有權門勢族。攬越依律治罪。庶國用益充。邊軍可無缺馬矣。

起終養南京吏部郎中蔡清爲江西提學副使

清終養守制闕報。巡按山東御史陸偁以弘治甲子鄉試馳使聘主試事。清以王朝之臣非王命不可行。辭不赴。至是卽其家擢江西提學副使。旣履任。修白鹿洞崇師儒。以德行道義教學者。而時時激勸之。江西相沿賀寧王壽皆具朝服。清至以爲不宜全用覲君之服。獨去朝服中蔽膝一件。寧王怒之。又三司官舊用初一十五朝寧王而於初二十六謁孔子。清力語三司勿徇舊例。俱以初一十五行禮。乃先謁孔子。而寧王益怒。寧王先憾都御史林俊。其左右因言清與俊厚。於是寧王怒不可解。而力求清之短。且遣其親信者傳誚京師。寧王一

日宴於三司間。故設機械。直譏清不工詩文。清以朝廷方面官。豈容藩王輕易折挫。據理對之。大拂其意。乃同事者。復有挾術相傾。清終不屑。輕自屈以取容。任其多方撻撻。尤以一身上下開繫。不欲竟墜其害也。遂引疾求致仕。寧王亦素聞清賢。遣儀賓諭留。且欲以女妻其子。異清附已。清力辭。卒求去。

右都御史史琳卒。○天鳴地震。○二月命大學士劉健等修孝宗敬皇帝實錄。○以儲璫爲左僉都御史。總制南京糧儲。○三月隕星如月。○夏四月。召總督兩廣都御史潘蕃爲南京刑部尚書。以兵部侍郎熊繡爲右都御史。總督兩廣軍務。兼巡撫。○少師兼太子太師吏部尚書馬文昇

致仕。以焦芳爲吏部尚書。

時御用監太監王瑞以大婚禮奏討書篆儒士七人吏部已奉旨考選矣。有旨令連考退人役通送本監考校優劣。馬文升言方杜塞倖門。堅執不從。上不聽。給事中安奎上疏乞聽馬文升言。不可墮奸計。大臣垂首喪氣。直道何由得伸。非國家之利也。瑞慙。誣奏文升拒命。大臣科道皆力爲辯。事始白。又兩廣缺都御史。總督軍務文升推兵部侍郎熊繡繡不樂外。憾文升。謀諸李東陽。將去文升。用劉大夏。皆湖廣人也。乃諷同鄉御史何文衢屢論文升。文升遂力求致仕。先後二十一疏。許之時吏部侍郎焦芳與司禮掌印太監李榮皆河南人相厚。

而芳亦與劉瑾善。爲之內援。故以芳代文升。

改南京吏部尚書林瀚爲南京兵部尚書叅贊機務。

瀚在南京吏部。嘗上重根本以回天變四事。曰保固南京。以重祖宗之根本。佑啟皇儲。以重天下之根本。撫綏百姓。以重邦家之根本。增進賢才。以重政治之根本。是年請老。疏云。臣在南京。親見諸尚書。翟瑄。董越。謝綬。王繼陳。道乞休不允。三年間。相繼物故。亦不允。至是。冢宰缺。給事中丘俊。御史石玠。薦瀚學優才膽剛方貞介。乃改南京兵部尚書。叅贊機務。因災異會陳十二事。曰。隆大孝以先天下言。先帝奄忽。上賓。陛下親承付託。惟任大臣而不改先帝所倚用。立大政而不易先帝所貽謀。

斥遠近習力體先帝親賢遠佞不假貴戚力行先帝割私任公戒飭邊備常若先帝不忘夷虜節省財費常若先帝不忘生靈事無巨細無內外惟倣先帝所已行者而力行之則大孝之實通于天下矣其次集羣議以決大政改州治以奉陵寢崇儉德以裕財用省虛費以甦軍民增貢舉以進人才修武備以禦寇盜省匠役以甦民困節工役以省財用清吏役以革宿弊清馬政以防欺蔽大優容以廣言路剴切無忌諱

五月以王瓊爲副都御史總督鹽法○六月辛酉雷震郊壇門太廟奉天殿○以先師裔孫孔彥繩爲世翰林五經博士○內閣大學士劉健等上疏自劾慰留之

上初卽位。東宮舊侍內臣劉瑾等。導上游戲內閣。劉健等上疏曰。皇上視朝太遲。免朝太數。奏事漸晚。游戲漸廣。長夏之時。遂停經筵。并輟日講。不知陛下宮中何以消日。奢侈玩戲。濫賞妄費。非所以崇儉德。彈射釣獵。殺生害物。非所以養仁心。鷹犬狐兔。田野之畜。不可育于宮廷。弓矢甲冑。戰鬪不祥之象。不可施于禁禦。夫使朝講久曠。正人不親。直言不聞。下情不達。而此數者交雜于前。則聖賢義理何由而明。古今治亂何由而知。民生困苦而莫伸。政事弊壞而莫救。宗社所係。生民所賴。今日之事。臣實憂之。六月中旬。風雨飄蕩。雷霆震驚正殿。鳴吻。太廟春獸天壇樹木。禁門房柱各有摧折。或至燒

燬天心示警益已甚明伏望陛下惕然修省悔悟平旦
視朝依期奏事屏去玩戲放逐鷹犬萬機之暇省閑往
日所進講章直解及諸衙門條上利弊采納施行庶可
上回天意下慰民心報聞復上疏曰近兩月以來日高
數丈尚未視朝待衛離披兵仗委棄萬衆共見有傷國
體文武百官久伺闕廷不惟精神困倦抑且妨誤政事
况茲天變民窮正宜恐懼修省怠荒若此禍患將至又
報聞健等復上疏自劾曰先帝顧命惓惓以陛下爲託
臣等痛心刻骨誓以死報及當初政竭力匡扶未敢輕
易求退近者地動天鳴五星凌犯星斗晝見白虹貫日
羣災疊異併在一時京城道路殺人西北諸邊胡虜倡

儼損軍折將戰則無兵守則無食民生窮苦府庫空虛風俗傾頽紀綱廢弛賞不當功罰不當罪法令不行名器冗濫諸司弊政日益月增百孔千瘡隨補隨漏當此之際內外臣僚協心倍力猶恐弗堪方且持祿固寵任情作弊讒謗公行姦邪得計變亂黑白顛倒是非人怨於下而不知天變於上而不畏竊嘗歷觀載籍徧閱古今未有如此而不亂者也恭惟陛下卽位之初詔書一降天下延頸相望太平而朝令夕改迄無寧日百官庶府倣效成風非惟廢格不行抑且變易殆盡建言者以爲多言幹事者以爲生事累次執奏則謂之再擾查革舊例則謂之紛更政在于民生國計則若罔聞知事涉

於近倖貴戚則牢不可破以一二人之私恩壞百年之定制而不顧以一二人之邪議違滿朝之公論而不恤臣等叨居重地徒擁虛銜或旨從中出畧不預聞或衆所擬議徑行改易累有論列多不允比爲戶兵等部議處功次等事具本上陳極言利害拱俟數見未蒙批荅若以臣等言是則宜俯賜施行臣等言非則亦明加斥責而仍留中不報視之若無使臣等趨向不明進退無據深憂極慮寢食靡寧亦知內告外順人臣之常但政出多門咎歸臣等們心反顧無以自明展轉于衷事非獲已若委顧命之名而不盡輔導之實因循玩愒竊祿苟容旣負先帝又負陛下伏乞聖明矜察特允退休別

選賢能代茲重任則陛下優待舊臣之心厲精新政之義兩盡無遺矣奉聖旨卿等切切爲治的心朕已知之言事待斟酌行着用心照舊輔導

秋七月彗星見參井掃太微垣○太白經天○八月立皇后夏氏○大角大火搖動○九月兵部尚書劉大夏致仕陞許進爲兵部尚書○陝巴剌子拜牙卽嗣忠順王○冬十月霾霧四塞○命太監劉瑾掌司禮監提督團營丘聚谷大用提督東西廠○劉瑾矯殺太監王岳范亨徐智罷少師兼太子太師吏部尚書華蓋殿大學士劉健少傅兼太子太傅禮部尚書武英殿大學士謝遷

上初自位青宮舊內侍劉瑾等日導上徇馬驚兔舞唱

角抵廢棄萬幾時號八虎戶部尚書韓文每朝退輒泣恨不能救正屬吏李夢陽談文曰大臣義共國休戚徒泣何益文曰計安出夢陽曰比言官章入交劾諸內侍章下閣閣老特劾章甚力公誠及此時率諸大臣成爭閣老又得諸大臣爭持劾章必益堅去瑾輩易耳文將鬚昂肩毅然改容曰善卽事弗濟吾年足死不死不足以報國明日早朝文密叩閣老閣老許之倡諸大臣諸大臣又皆應諾文退令夢陽具疏草文讀而笑之曰是不可文文上非省也不可多多覽弗竟也遂令九卿諸大臣上言曰臣等伏念人主以辯姦爲明人臣以犯顏爲忠故羣小之姦逼近君側勢足以危社稷亂天下伏

未及發是謂禍萌故曰萌不可長臣等待罪股肱之列
值主少國疑之秋仰觀乾象俯察物議瞻前顧後心焉
如割至於中夜起歎臨食而泣者屢矣臣等伏思與其
退而泣歎不若昧死進言即使進言以死不猶愈於緘
默苟容乎此臣之志亦臣之職也臣等伏覩近歲以來
朝廷日非號令欠當自秋來視朝漸晚仰窺聖容日漸
清癯皆言太監馬永成谷大用張永羅祥魏彬劉瑾丘
聚等置造巧僞淫蕩上心或擊毬走馬或放鷹逐兔或
俳優裸劇錯陳於前或導萬乘之尊與外人交易狎昵
媒褻無復禮體日游不足夜以繼之勞耗精神虧損至
德遂使天道失序地氣靡寧雷異星變桃李秋花考厥

占候咸非吉祥切緣此等細人惟知蠱惑君上以便已
行私而不思赫赫天命皇皇帝業在陛下下一身今大婚
雖畢儲嗣未建萬一游宴損神起居失節雖將此輩羣
粉殖臨何補于事乎昔我高皇帝艱難百戰取有四
海列聖繼承傳之先帝以至陛下先帝臨崩顧命之語
陛下所聞也柰何姑息羣小置之左右爲長夜之游恣
無厭之欲以累聖德乎竊觀前古閹宦誤國其禍尤烈
漢十常侍唐甘露之變是其明驗今照馬未成等罪惡
旣著若縱而不治將來無所忌憚爲患非細伏望陛下
奮剛斷割私愛上告兩宮下諭百僚將馬未成等拏送
法司明正典刑以回天地之變以泄神人之憤潛消禍

亂之階永保靈長之業則皇上爲守成之令主臣等亦得爲太平之具臣矣事關安危情出迫切不勝戰慄俟命之至疏入上驚泣不食諸閣大惧初閣議持言官章不肯下諸閣業已窘相對涕泣會諸大臣疏又入上遣司禮監八人齊詣閣議一日三至健等益持議不肯下八人中有王岳者亦東宮舊臣也素剛直頗惡其儕所爲獨曰閣議是明日忽有旨召諸大臣入諸大臣或有咎韓文者曰公疏言何文故不應至左順門太監李榮手諸大臣疏曰有旨諸大臣愛君憂國言良是第奴儕事上久不忍卽置之法幸少寬之上自處耳衆惧莫敢出一語惟韓文曰今海內民窮盜起水旱頻仍天變日

增文等備員卿佐靡所匡救上始踐祚輒棄萬幾游宴
無度狎昵羣小文等何忍無言榮日上非不知第欲寬
之耳是日瑾等業自求去南京安置而閣議猶持不從
王岳與司禮太監范亨徐智亦助文等密奏於上言外
朝多官劾奏不可不從上不得已允之會天晚待明旦
發旨捕劉瑾等下獄劉瑾素故李東陽有詩文名而焦
芳亦與瑾厚遂以內閣堅持之議泄於瑾瑾左右亦以
王岳密奏告之瑾等夜趨上前繞跪伏哭以頭觸地訴
王岳等內外交通欲害奴等上色動瑾又曰若待明日
瑾等不得見天顏矣須今晚拿岳等三人送獄方可上
不得已領之瑾又進曰狗馬鷹兔何損萬幾今左班官

政譁無忌者司禮監無人也有則惟上所欲爲誰敢言
者上怒是夜立命劉瑾入掌司禮監兼提督團營又收
王岳等下獄設內行官校巡察丘聚提督東廠官校巡
察谷大用提督西廠官校巡察張永等並司營務分據
要地王岳范亨徐智俱發南京充淨軍瑾黨長隨王成
等追至臨清少沙灘縊殺之內閣復上疏曰此數人者
蠱惑引誘罪大惡極得罪祖宗非皇上所得而赦臣等
不能及早匡救罪難辭今事既至此又豈敢阿從以重
傷聖德伏望聖明剛斷俯察羣言拏送法司從重究治
以絕禍根則聖德光輝聖躬安泰上以慰先帝在天之
靈下以副天下臣民之望上令司禮監傳諭直貸瑾等

內閣又上疏曰伏見舊年以來龍顏清減心切憂懼傳聞每夜戲樂有妨寢膳皇城禁門開閉無節甚至入市交易全無扈衛皆左右引誘以致聖心荒怠政令乖違財盡民窮上干天變昨者府部科道等合詞累奏所謂事情又有臣等不及知者皆謂太監劉瑾等狎昵淫巧罪大惡極欲乞明示典刑臣等讀未終篇涕泣交下連日司禮太監李榮等三至內閣傳示聖意乃謂瑾等自幼服侍不忍據行斥逐夫人君之于小人若不知而誤用其失猶小天下尚望其能知而去之知而不去人心危疑被其離間天下之事無可復爲必至於亂亡而後已今數人者情罪畢露乞卽早賜斥逐且邪正之勢必

不兩立今滿朝文武公卿科道皆欲急去數人而使之尚在左右非但朝臣懷疑俱而此數人者亦恐不能自安上下相疑內外不協禍亂之機皆自此始宗社所關誠非細故上不允健等各上疏求去先是瑾等嘗奏言內閣專執朝權納賄行私及言文官欺壓內臣武職之事至形于劇戲上久信之至是遂令劉健謝遷致仕李東陽獨留蓋前閣議時健嘗提案哭遷亦嘗瑾等罔休惟東陽不出一語故得不去東陽上言臣等三人責任一同而獨留臣將何辭以謝天下章屢上竟不允劉健謝遷頻行東陽祖餞欷歔而泣健正色曰何用今日哭爲使當日出一語則與我輩同去耳東陽默無以應其

後劉瑾于朝陽門外造玄真觀東陽爲製碑文極其稱頌人始信其泄捕瑾之事爲真也。

以吏部尚書焦芳蕪文淵閣大學士吏部左侍郎王鏊蕪翰林院學士並直文淵閣

芳性險愎始附尹旻父子旻敗芳以待講學士謫桂陽州同復累遷至尚書劉健與韓文謀除瑾黨芳潛通於瑾由是劉健等相繼斥罷黨勢益熾瑾遂引芳入閣表裏爲姦凡變紊成憲桎梏臣工杜塞言路酷害軍民皆芳導之暨充孝廟實錄總裁官筆削任意凡先正名卿悉加醜詆授意檢討段昇以快私忿王鏊入閣東陽引之。

改許進爲吏部尚書○十一月欽天監五官監候楊源上疏杖闕下

源上疏言。占候得大角及心宿中星動搖。天璇火機。天權星。星不明。乞安居深宮。絕遠游獵。罷弓馬嚴號令。毋輕出入。闕除內侍寵倖。游逸小人。節賞賜。止工役。親元老。大臣日侍。講習詩書。疏下。禮部禮部言。源占候之言。深切時弊。源復疏言。十月二十六日占候得連日霾霧。交作。爲衆邪之氣。陰冒于陽。臣欺于君。小人擅權。爲下叛上。引譬甚力。劉瑾怒。矯旨杖三十。

罷戶部尚書韓文及其子士聰。士奇皆削籍。

劉瑾恨韓文。令人日伺其過。會有進納內府折銀者。內

有假僞驗出以文不能防姦矯旨令罷職歸復陰遣邏卒伺察于途文乘一驢宿野店而去戶科給事中徐昂論救言文忠憤所激不應勒停昂坐除名爲民於是文子高唐知州士聰刑部主事士奇皆削籍。

降李夢陽山西布政司經歷罷之

以韓文疏夢陽作也

○逮尚寶司

卿崔濬按察副使姚祥郎中張偉枷號示衆

邏卒伺韓文無所得適有郎中張偉公差回乘轎尚寶卿崔濬冊封回帶家小馳驛乘轎按察副使姚祥赴任亦馳驛用人夫俱奏之捕下獄崔與姚枷號西長安門外張偉枷于通州張家灣內閣部院大臣奏乞寬宥釋枷充邊衛軍自是內外庶官皆重足而立欲謝政去

而不可得矣

罷左都御史張敦華

敦華風采凝重義利介然不爲詭隨劉瑾惡之矯旨令致仕去尋卒敦華初爲庶吉士內閣李賢彭時欲留爲翰林敦華與大夏力辭不就二公皆以政事爲名臣云以顧佐爲戶部尚書劉宇爲兵部尚書○起致仕吏部尚書屠滂爲左都御史○進李東陽少師兼太子太師吏部尚書華蓋殿大學士焦芳太子太保武英殿大學士王鏊尚書華蓋殿大學士焦芳太子太保武英殿大學士王鏊戶部尚書文淵閣大學士

先是劉健在內閣河南信陽人何景明年少能詩人以爲首相同鄉必選入翰林無疑健曰此子福薄能詩何

用不取後景明除中書舍人官至提學副使不壽卒自來居內閣不黨比故舊僅見健一人東陽以神童舉與程敏政齊名然皆以詩名延引後進海內名士多出其門往往破常格不次擢用寢成黨比之風而不能廸知忱恂舉用真才實學當時有識之士私相講論以爲數年後東陽柄用引進一番詩文之徒以誤蒼生尚名矯激世變將起

命劉瑾剖斷天下章奏

上悉以天下章奏付瑾剖斷初亦送內閣票旨但秉筆者自爲觀望本至先問此事當云何彼事當云何皆逆探瑾意爲之有事體大者令堂候官至門下問之然後

下筆故瑾益恣肆後自於私宅檢取票旨奏聞批出專用松江人張文冕者紀錄謄寫府部等衙門官稟公事者填滿其間自科道部屬以下皆行跪禮大小官公差出外及回京者朝見畢皆赴瑾宅見辭以爲常惟瑾自建白本則送內閣要票旨東陽必極其稱美有曰爾公明正直爲公除弊等語務爲容悅議者謂其伴食中書坐保富貴視劉謝二內閣有愧矣

下戶科給事中劉蒞刑科給事中呂紳于詔獄

戶科給事中劉蒞上疏極陳時政其畧曰近日權姦預政事勢異常聰明漸墜弊端日滋各處地方大監及各省鎮守內臣何必數數更換用新人固不若用舊人養

饑虎固不如養飽虎蓋舊人猶或知事飽虎猶或易餒也又云方今備邊無良策只增年例之銀兩理財無良謀賈及廣東之庫藏浙江既奏軍士無糧餉者已累數月山西又奏歲入不穀歲出者幾五十萬小民困苦而征歛益急帑藏窘乏而用度日奢今日之財用如此何所恃而不動心哉范甌數千言言皆剴切遂下詔獄刑科給事中呂狝上疏乞留劉健謝遷亦下獄

逮南京六科給事中戴銑等十二道御史薄彥微等二十人下錦衣衛獄

戴銑等上疏乞黜權閹正國法留保輔以安宗社劉瑾大怒捏旨差官校俱逮繫錦衣獄瑾仍捏旨劉范呂狝

及戴銑薄彥徽等二十人各廷杖三十除名爲民
兵部主事王守仁下獄廷杖謫貴州龍場驛丞

南科道官戴銑等被逮王守仁上疏云臣聞君仁則臣
直大舜之所以聖以能隱惡而揚善也臣邇者竊見陛
下以南京戶科給事中戴銑等上言時事特勅錦衣衛
差官校拏解來京臣不知所言之當理與否意其間必
觸忌諱上千雷霆之怒但以銑等職居司諫以言爲職
其言而善自宜嘉納施行如其未善亦宜包容隱覆以
開忠讜之路乃今赫然下令遠事拘囚在陛下之心不
過示懲創使其後日不敢輕率妄自論列非果有意怒
絕之也下民無知妄生疑懼臣切惜之在廷之臣莫不

以此舉爲非宜。然莫敢爲陛下言者。豈其無憂國愛君之心哉。懼陛下復以罪銑等罪之。則非惟無補于國事。而徒足以增陛下之過舉耳。然則自是而後。雖有上關宗社危疑之事。陛下孰從而聞之。陛下聰明超越。苟念及此。寧不寒心。况今天時凍沍。萬一差去官校。督束過嚴。銑等在道。或致失所。遂填溝壑。使陛下有殺諫臣之名。與羣臣紛紛之議。其時陛下必將追究左右。莫有言者。則既晚矣。伏願陛下追收前旨。使銑等仍舊供職。擴大公無我之心。明改過不吝之勇。聖德昭布。遠近人民胥悅。豈不休哉。臣又惟君者元首也。臣者耳目手足也。陛下思耳目之不可使塵塞。手足之不可使痿痺。必將

惻然而有所不忍矣。疏入。劉瑾大怒。廷杖五十。因謫龍
場驛丞。守仁回至錢塘。尋慮瑾知枉道不免於禍。乃乘
夜伴爲投江。而浮冠履於水上。浙省二司及杭守楊孟
瑛比其信之。祭之江上。家人亦成服。守仁遂匿形輕裝入
閩武夷山中。復慮終露。又遁投江右寧王外戚婁姓家
中。駕言投江不灰有神助也。欲以聳動寧王爲窟。或謂
之曰。畢竟爲累。乃赴龍場。

吏部侍郎蕪翰林學士張元禎卒。○南京副都御史陳壽
除名。

戴銑等被逮。壽連疏論救。瑾怒。矯旨械繫赴京。罰米三
百石。發居庸監追罷其官。

南京兵部尚書林瀚調官勸致仕。

時逆瑾側目方正士。會南京科道官言事。彼逮瀚獨往送。贐以俸金。且議上章直諸言官。瑾聞之。恨勒科道招詞逮瀚。為黨矯詔降浙江左叅政致仕。

丁卯二年春正月。令兩京都察院御史章奏。必先呈堂稟詳。○三月乙亥朔。日有食之。○以詹事楊廷和為南京戶部右侍郎學士。劉忠為南京禮部右侍郎。

正德二年春。上御經筵講書。故事。講解書義畢。終必獻規諫之語。是日詹事楊廷和學士劉忠直講既罷。上謂劉瑾曰。經筵講書耳。何書外添出許多說話。瑾與廷和等皆舊東宮官。奏曰。此二人當打發南京去。陞二人南

京侍郎。是時南京無缺。皆添註之。雖若遠之。實陞之也。忠謂廷和曰。此行須別瑾否。廷和曰。瑾所爲如此。不可再見之人。知必以我輩交瑾矣。忠深然之。廷和密以蜀錦辭瑾。瑾曰。劉先生不足我耶。後瑾遂厚廷和而疎忠。其賣友如此。時劉宇爲兵部尚書。托保國公家人朱瀛者。交通劉瑾。無日不來兵部說話。楊廷和弟廷儀爲兵部郎中。每伺瀛出。必招入司署。留坐款語。四司官不附宇者。瀛言于瑾。必傳旨令外補。廷儀獨諂諛宇。極妾婦之態。宇大悅。廷儀能文。奏章皆令廷儀草之。

詔巡茶御史燕理馬政

正德二年都御史楊一清疏請查照先年事例。仍命御

史巡茶蕪理馬政兵部擬議題奉欽依陝西一應馬政
都着巡茶御史蕪管務要着實舉行不許如常怠玩疏
曰孝宗皇帝采納廷議專設風憲重臣督理馬政臣猥
以庸劣適當任使後因茶法馬政二事命臣蕪理顧廢
墜既久之事更新興舉事勢頗難凡所規畫處置皆遵
行明命盡臣之心不敢有遺慮竭臣之才不敢有遺力
但念天下之事創作者必專而後成交承者必守而無
失臣受命之初責任最專易於集事自蕪巡撫以來顧
此失彼已不如前比者復蒙皇上加任總制經理邊方
責任重大其於監牧茶馬之政勢不能及悞隳前功以
貽後責臣切惟馬政茶法事體相須先年兩寺馬政巡

撫蕪管。而茶馬巡察御史主之。巡撫政事繁多。馬政實不經意。而茶司所易良駑莫究。騎操所給登耗不聞。本末始終。茫不相攝。虛名無實。亦勢使然。頃設督理馬政之官。蕪管數事。茶司之所易。卽監苑之所牧。監苑之所牧。卽官軍之所給。非惟不相悖。而反相爲用。故臣之不才。亦得稍效其愚。此後督理之官。恐難復設。若令巡撫帶管。不無仍蹈舊轍。莫若復巡茶之官。而蕪理之爲便。如蒙仍設巡茶御史。務選年深老練。實心幹事之人。請勅蕪理馬政茶法。行太僕寺官員。專聽提調約束。各衙門不必干預。庶幾事有定規。可大可久。爲益實多。

南京國子監祭酒章懋謝病歸○劉瑾矯詔指劉健韓文等爲奸黨榜諸朝堂

正德二年逆瑾矯勅戒諭百官勒罷公卿臺諫數十人又指內外忠賢爲奸黨矯旨榜朝堂畧曰奸臣王岳范亨徐智竊弄威福顛倒是非私與大學士劉健謝遷尚書韓文揚守隨林瀚都御史張敷華戴珊郎中李夢陽主事王守仁王綸孫槃黃昭檢討劉瑞給事中湯禮故陳霆徐昂陶諧劉蒞艾洪呂紳任惠李光翰戴銑徐蕃收相徐暹張良弼葛嵩趙仕賢御史陳琳貢安甫史良佐曹蘭王弘任諾李熙王蕃陸昆張鳴鳳蕭乾元姚學禮黃昭道蔣欽薄彥徵潘鏗王良臣趙佑何天衢徐鉉

楊璋熊倬朱廷聲劉玉通相交通彼此穿鑿彼各反側不安自陳休致其勅內有名者吏部查令致仕

勅各處鎮守太監得預刑名政事

時新更天下鎮守太監奏乞如巡撫都御史之任干預刑名諸政劉瑾從之令內閣撰勅增入由是中官挾勢利害憲臣不能禁矣有太監畢真者初差天津取海鮮至是請勅自山東沿海達於蘇州浙江福建所至括民財凌辱官吏莫敢言者○故事六部奏准差官請勅該部備事由送內閣請勅書未有不由六部而內閣自出勅者也畢真等勅并正德間內官賜生祠額護勅皆劉瑾分付內閣創爲之當初內閣若能執事則差官不由

六部職掌奏行又不敢擬寫縱使不從亦不過如劉健等去位而已乃不能然可嘆哉

夏四月逮巡撫江南右都御史艾璞下獄編管南海

先是有勲戚家與無錫民人訟田璞承勘悉以還民勲戚賂劉瑾復訟使者覆勘承瑾風旨乃悉以共田歸勲戚且劾璞前勘非是瑾矯旨逮璞赴詔獄訊之璞不屈曰實民田也瑾怒箠之幾死數日方蘇除名全家發南海瓊州爲民

罷禮部尚書李傑起前任禮部尚書張昇代之亦尋罷時晉府鎮國將軍表樵賂劉瑾求封爲郡王傑持不與瑾銜之竟以是罷去復起前禮部尚書張昇代之尋以

忤瑾亦罷。

五月陞楊廷和南京戶部尚書。劉忠南京禮部尚書。

時楊廷儀因朱瀛通情于瑾。瑾傳旨罷南京戶部尚書。秦民悅。以廷和代之。以忠與廷和同打發過南。故亦陞忠禮部。

起雍泰爲左副都御史提督操江。

時給事中潘鐸薦泰有敢死之節。克亂之才。遂詔起用。固辭弗允。

秋八月世宗皇帝生於興邸。○總制三邊軍務都御史楊一清致仕。○杖欽天監五官監候楊源於闕下尋卒。源疏言。自正德二年來。一向占候得彗星入太極垣。

座之前。或東或西。往來不一。勸上宜思患預防。瑾大怒。罵源爾何官。亦學爲忠臣。遂矯旨。逮送錦衣衛。痛杖三十。謫戍肅州。行至懷慶卒。

加焦芳少傳。兼太子太傳。護身殿大學士。王鑒少傳。兼太子太傳。武英殿大學士。○加吏部尚書。許進兵部尚書。劉宇。並太子太保。○九月。陞雍泰爲南京戶部尚書。尋致仕。時逆瑾用事。以泰爲同鄉人。欲親用泰。泰不之應。遂斥泰去。而諸所嘗薦泰者。皆獲罪。泰歸復居常曲。日焚香讀書。其鄉人論稽事。不與上官相見。

冬十月。以楊廷和爲戶部尚書。兼文淵閣大學士。直文淵閣。

時內閣例用三人李東陽焦芳王鏊皆見任楊廷儀復謀于劉宇托朱瀛求劉瑾取入閣許重謝瑾瑾許之下手勅取廷和入閣辦事南京尚書入閣自廷和始廷儀以白金三千兩并金銀器皿托朱瀛陳于玄真觀瑾大悅納之。

賜皇親沈溥吳讓靜海莊田

凡三千五百餘頃讓妻厲氏奏稱河間府靜海縣莊田一處原係河淤退灘土田乞照皇親夏儒事例給與管業事下戶部查得河間府莊田冊並無靜海縣河淤退灘田地四至及差官勘得雖稱無徵荒地但須畝數多見有軍民管業難便定上不從卒賜二家爲庄田永業。

靜海縣原額一十九里編戶二千三百年來迺移絕滅已過其半止併得八里人戶九百而已皆因本縣田土盡爲皇親勢家所奪無復餘地可耕種也。

十一月革各省巡撫都御史及兵備憲臣。

劉瑾用事以天下巡撫官非舊制又知天順間亦曾革罷乃將各處巡撫都御史俱取回惟邊方及漕運都御史仍舊。

十二月改劉忠爲南京吏部尚書○復寧王護衛是時宸濠通逆瑾賂金錢無算故得復議給

名總督兩廣右都御史熊繡回掌南院命陳金總督兩廣軍務兼巡撫○始差給事中御史查盤各邊糧草

瑾以邊方粮草多弊。令兵部奏差給事中御史查盤。回奏內有粮粗粃草泥爛者。瑾矯旨逮繫各巡撫及各管粮郎中下獄。既至鎖杻。差人押至所任地方勒令加倍賠償。凡各商人納過粮草未給價銀。皆沒官不給由。是商賈困弊。邊儲日乏。

戊辰三年春正月。劉瑾令朝覲官每布政司納銀二萬兩。各布政司皆揭借於京師富家。及回任括取民財加倍償之。

逮李夢陽下錦衣衛獄。尋釋之。

夢陽代韓文草疏。瑾已請出之。猶未快於心也。復以他事械至京下獄。將置之死。時翰林修撰康海與夢陽同。

有才名瑾慕海欲招致門下而海不往夢陽所親有左
姓者謂夢陽曰子殆無生路矣惟康子可以解之夢陽
曰吾與康子素不相善今死生之際始托之獨不愧於
心乎左曰不謂李子而爲匹夫之諒也夢陽乃以片紙
書數字曰對山救我惟對山爲能拯我海曰是誠在我
我豈敢吝惡人之見而不爲良友一避咎也遂詣瑾瑾
焚香迎之延置上坐曰今日有何好風吹得先生來也
海曰昔唐明皇任高力士寵冠羣臣且爲李白脫靴公
能之乎瑾曰卽請爲先生脫之海曰不然今李夢陽高
於李白海固萬不及一者也公不爲之援柰何欲爲白
脫靴哉瑾曰卽當幹旋之海遂與之痛飲達曙夢陽得

釋而海因與瑾密遂罹清議矣

太子少保吏部尚書許進除名

進不阿劉瑾時考察外官諸貪殘吏厚賂瑾皆欲留之進不聽其朱瀛者爲劉字謀欲得吏部乃乘間言于曰許尚書佯爲恭謹而外示抗直如雍泰平昔剛暴朝廷屢貶謫不用今欺公公舉用之却又揚言于外曰公與泰同鄉用之非吏部本意也瑾方怒泰不道及聞此言大怒遂矯旨除進籍

以劉宇爲吏部尚書曹元爲兵部尚書○屠瀟仍以吏部尚書兼左都御史掌院事

都察院一日上審錄重囚本內寫劉瑾傳奉字樣重復

數多瑾大怒罵之都御史屠滂急着十三道御史謝罪御史跪于階下瑾數其罪斥責皆叩頭不敢仰視久乃起去。

以王瓊爲吏部右侍郎○二月南京國子祭酒章懋致仕○三月賜進士呂柟等三百五十人及第出身有差○改翰林院編修顧清等爲各部屬官

時焦芳子焦黃中會試中式芳意欲得大魁旣而衆論取呂柟爲第一而黃中居二甲首芳謂顧清等諸執事官抑之遂入言于劉瑾改清等爲部官而授黃中以檢討及劉宇之子劉仁等六七十人俱爲庶吉士數月黃中與仁等皆擢編修

下長蘆巡鹽御史徐禎于獄。謫戍肅州。

禎初知江陰縣。吏部嘗奏禎治行爲天下第一。徵爲御史。差長蘆巡鹽劉瑾欲令割送該年餘鹽銀兩。禎弗從。瑾深銜之。及禎復命。俟於朝門。適遇瑾出。又怪不行跪禮。卽矯旨拏送錦衣衛獄。二次各杖三十。發肅州衛求逋充軍。以杖傷重。以于獄。瑾仍令查拘禎男徐朴。發衛補伍。及至。瑾敗。始釋寧家。

逮前總制三邊都御史楊一清下獄。尋釋之。

時賴李東陽力救得釋。兵部疏言一清修邊。纔有端緒而去。凡糴餉費銀十餘萬兩。起戶役銀十六萬兩。及諸犒勞藥餌轉運木石皆一清精神運用計慮周悉。今付

之新任撫臣意有異同事無統紀恐徒費財靡益邊務
乞勅大臣專理議上兵部右侍郎文貴右副都御史張
璽乞簡用瑾意不欲修邊內批罷役銀鎔大鐸解京事
竟止

致仕吏部尚書王恕卒○夏四月南京國子司業羅欽順
除名○五月南京右都御史熊繡致仕○六月給事中安
奎御史張或都御史劉孟荷校東西長安及吏部門外
劉瑾行事益務嚴刻動用一百五十斤大枷枷號示衆
給事中安奎御史張或因盤糧數不明枷于東西長安
門外時暑雨晝夜不輟莫敢少移都御史劉孟到任延
遲枷示于吏部門外文臣垂首喪氣惟恐獲罪

執京朝官三百餘人下詔獄尋釋之

一日早朝有遺空名文書于丹墀者上見之命拾以進
乃是言劉瑾等亂政事瑾遂下殿入文班詰問無肯承
瑾疑羣臣所爲乃分五品以下官三百餘人出午門跪
聽處分至午後不放時酷暑暴于烈日中多不能當當
有仆地曳出死者十餘人至晚悉械送錦衣衛獄追究
竟無踪跡李東陽奏此事必一人陰謀所爲同朝諸臣
倉卒拜起豈能知之乃盡得釋

逮前任戶部尚書韓文下錦衣衛獄罰米放歸

瑾憾韓文不已仍矯詔差官校械繫至京下錦衣衛獄
計欲殺文適有投匿名書于朝者乃不果殺坐贖米死

後二千石家產不能償皆稱貸以給乃放歸

秋八月進楊廷和少保兼太子太保○逮前兵部尚書劉大夏南京刑部尚書潘蕃下錦衣衛獄謫戍

劉大夏爲兵部時孝宗召見嘗言劉宇在大同私養官馬饋送權貴孝宗密遣錦衣百戶邵珙往察之以養馬未送回奏司禮太監李榮爲解得免宇恨大夏言於劉瑾曰籍劉尚書家可得幾萬金會岑猛怨潘蕃奏降圖還田州納賂劉瑾瑾械潘蕃原奏岑猛獄詞大夏在兵部議覆遂矯詔以岑猛爲田州同知逮大夏潘蕃至京下錦衣衛獄將坐以激變土官罪死大學士王鏊曰岑氏未叛何名爲激變集大臣議都御史屠淵亦曰大夏

無成罪。瑾勃怒惡語罵瀟。乃與劉宇謀者大夏輕議夷人遷徙與瀟尚書俱發戍瑾初擬廣西邊衛焦芳曰是送二人歸也。乃發肅州衛永達充軍。大夏即買驢僱車以行。出都門日觀者如堵所在父老涕泣士女攜筐餽進果食亦有焚香寄禱願公生還者。

陞南京右都御史張泰爲南京戶部尚書令致仕

泰素清貧以南院都御史奉表入賀聖壽以土葛遺瑾瑾衛之會吏部以南戶部尚書員缺推泰補之。瑾遂矯旨令陞職致仕。

調翰林學士張芮爲鎮江府同知。修撰何瑋爲開封府同知。

芮朴實直遂見瑾長揖不拜璠亦亢直不屈瑾皆托事調爲同知

陝西舉人郝序于獄發戍

劉瑾崇重內臣馬永成等八黨皆封父爲都督母爲夫人欽賜造墳祭葬祭文皆內閣李東陽等所撰該部不敢執臺諫不敢言戶部侍郎郝志義病故其子舉人郝序援例陳乞祭葬而無賂餽劉瑾遂謂洪武禮制無此條例下序錦衣衛獄問發充軍

能送各邊年例銀兩

劉瑾因戶部奏送各邊年例銀兩以爲祖宗朝無此例命戶部尚書顧佐查天順年以前年例銀數佐以天順

前無前銀例回報瑾大怒曰此戶部官通巡撫邊方都御史共盜內帑銀兩之明驗也悉追問致罪革罷送銀之例邊儲至是缺甚蓋自成化八年開設榆林衛余子俊增置城峽陝西民供不繼奏送江南折糧銀以備不足然初亦依江南原折銀例每米一石折銀二錢五分放支軍士其後大同等邊缺乏亦暫送銀補足數皆不多未有以萬計送者弘治間戶部尚書葉琪與內閣徐溥同年最厚琪淮安人塩商皆其親識因與琪言商人赴邊納糧價少而有違涉之虞在運司納糧價多而得易辦之便琪遂奏准兩淮運司塩課於運司開中納銀解戶部送太倉銀庫收貯分送各邊自此各邊始有年

例銀兩以補商人各邊上納之數也。自洪武永樂以來天下鹽課俱開中各備上納本色米豆商人欲求鹽利預於近邊轉運本色以待開中故邊防粟豆無甚貴之時。今廢商人赴邊報中之法近年米豆無人買運價遂騰涌正德五年侍郎叢蘭整理陝西邊儲遂令百姓每名徵銀二兩五錢准米一石蓋六部政本少有差錯貽弊如此使顧尚書當劉瑾查問之時荅曰昔鹽課在各邊上納故無年例銀之送後改鹽課銀解京故不得不分送各邊如此瑾必不怒而反正鹽法琪必受其禍矣冬十月四川盜起名致仕右副都御史林俊巡撫四川兼贊理軍務督兵討之○十一月禮部侍郎掌國子祭酒謝

鐸致仕○十二月起致仕江西提學副使蔡清爲國子祭
酒尋卒復起致仕山西提學副使王鴻儒爲國子祭酒
己巳四年春正月以邵寶爲右副都御史總督漕運巡撫
江北尋致仕

時劉瑾擅權寶無所通瑾啣之每撼以危言不動瑾惡
平江伯平江伯漕帥也事與寶相關瑾怒禍且不測李
東陽力解寶乃得致仕去

追奪纂修會典陞職者

弘治間李東陽等奏准纂修大明會典自東陽而下翰
林春功官皆陞職瑾以爲壞祖宗制書妄雜以新例毀
其事悉追奪之吏部尚書兼學士梁儲降爲侍郎左庶

子毛澄左諭德傳珪等皆降職焉惟李東陽不動

夏四月少傅兼太子太傅戶部尚書武英殿大學士王鏊致仕

鏊見焦芳專事姦阿劉瑾驕倖日甚無可柰何居常戚戚至是力求去劉瑾猶欲中傷之鏊惴惴至家瑾敗得免嘗自贊曰噫嘻先生何如其人窮年校書結髮勵行白首於道茫然無聞者乎爵則公孤志懷輸忠幾昧納約者乎貴戚赫炎不能附麗權璫狂獬不能姦阿一有違言超然不辱者乎遇事直前不知顧忌見利思義不知規避歸臥空山晏然寤寐者乎斯人也其量則隘其才則庸無裨于世自潔其躬跡其所至蓋知慕首陽之

節而不知柱下之工。知希止足之疏而不能爲應變之
崇者乎。

降南畿提學御史陳琳爲揭陽縣丞。

琳以劉瑾陰排大臣。顯挫臺諫。上言老成不可不惜。狂
直不可不宥。言甚切至。疏入忤旨。遂謫廣東揭陽縣丞。
五月孝宗敬皇帝實錄成。

王鏊曰。班固歟。天下不復有史矣。古之所謂史官。皆世
守之。人主所在執筆以從。隨其言動。皆親見而直書之。
所謂信史也。後世史官。雖具員而無定職。人主動靜。迺
不相及。政事不及與聞。惟易世之後。則集前後奏疏而
分曹書之。以宰臣爲總裁。奏疏之語。果皆實乎。分曹之

人宰臣之意果皆公且正乎且生于數十年之後追書于數十年之前其是非曲直皆茫然無聞或得之傳聞已非其實縱得其實而亦莫燭其情僞或奪于衆不得書或迫于勢不敢書或局于才不能書故一時君臣謀議勲業汨沒不傳而姦愴情態亦無能發其微以爲世戒監領者又徃徃以私好惡揀乎其間故曰不復有史矣

進焦芳少師兼太子太師吏部尚書華蓋殿大學士復梁儲吏部尚書兼學士

梁儲尋改南京吏部尚書劉瑾惡其不附已也

調翰林坊局官爲部屬

劉瑾惡諸翰林官。及修孝廟實錄成。例皆進秩。瑾恠不與。或嗾之曰。文士不習世故。乃改翰林侍讀徐穆。編修汪俊等。凡瑾所銜者十餘人。皆爲南部員外主事等官。謂俾擴充政務。

遣御史等官清理各邊屯田

劉瑾旣止各邊年例銀。又禁商人報納邊儲。遂大匱乏。因詢國初如何充足。議者以爲國初屯田修舉。故軍食自足。後爲勢家所占。以此軍不自給。瑾遂慨然修舉屯田。分遣胡汝礪。楊武周。東顏。順壽等。往各邊丈量屯田。以增出地畝數多。及追完積逋者。爲能。否則罪之。又命散銀于近邊州縣。百姓買米陪脚耗。運送邊倉交納。奉

行苛刻人不聊生各邊僑增屯田每至數百餘頃悉令
出租周東在寧夏與都御史安惟學比較屯糧尤嚴加
刑於軍官妻人心憤怨指揮何錦等遂與安化王謀起
兵傳檄以誅瑾等爲名瑾禍自此起矣

六月陞南翰林侍讀學士石瑤爲南國子祭酒○進吏部
尚書劉宇少傳燕太子太傳文淵閣大學士入閣辦事○
陞吏部左侍郎張綵爲吏部尚書

綵陝西人以文選郎中養病歸劉瑾專政查京官養病
久者悉革爲民未久者令赴京聽除綵在文選時焦芳
爲侍郎甚相得芳乃薦于瑾曰張綵公之鄉里極有才
可用瑾復以爲文選陞巡撫副都御史尋陞吏部侍

卽劉宇入閣遂以綵代之綵一意故事劉瑾

秋八月遣張莊王之常德

榮王祐樞弘治四年封常德正德初留京邸劉瑾惡之與吏部尚書張綵謀遂逐王就國是時劉瑾方有逆謀故不欲天潢血屬之在肘腋也

九月遣御史甯杲殷毅薛鳳鳴捕畿內盜

劉瑾用事益專恣驕橫霸州文安諸處響馬強盜生發瑾不勝忿欲速除之用人言遣御史甯杲于真定殷毅于天津薛鳳鳴于淮陽專一捕盜舊例御史出差不得以家眷隨今差杲等令攜家眷責以滅賊爲期鳳鳴在歸德與守備指揮石壘會飲令人歌舞爲樂瑾還卒奏

之傳旨降鳳鳴爲徐州弓手。殺在天津稍收歛。惟臬奏立什伍連坐法。盜賊捕獲無虛日。每械盜賊入真定城。用鼓吹前導。金鼓之聲。彌日不絕。由是奸人無所容。盜賊多內官張忠姪張茂爲大盜竊主。臬親往捕獲斬之。啖其心。霸州盜劉六。劉七。齊彥名輩。因是聚衆爲亂。瑾以捕盜功。陞臬與毅皆爲僉都御史。仍專督捕盜。

閏九月奪平江伯陳熊爵。

正德二年。命平江伯陳熊總督漕運。劉瑾橫索金錢。熊不應。瑾使邏卒日伺其事。竟坐多買田宅。侵民利。謫海南衛。奪其誥券。

冬十月。虜入花馬池塞。殺總制尚書才寬。

弘治末。朝廷清明。內外大臣。協心體國。爲經久計。以故議復河套。會孝宗崩。劉瑾專政。楊一清得罪去。無敢言及河套者。卽有建白。輒云修邊。或曰進幾里。扞虜。或又曰退幾里。固我我邊。日退套。虜日進。是月虜入花馬池。塞殺總制尚書才寬。

庚午五年春正月。命刑部尚書洪鍾。兼左都御史。總制軍務。討四川流賊。

時四川保寧流賊劉烈聚衆作亂。僭號稱王。侵掠陝西漢中等處。又有藍廷瑞。鄔本恕。廖惠等。亦稱順天王。剽掠地。王掃地。王衆至十萬。侵入湖廣。鄖陽等處。於是復命洪鍾總制軍務。督陝西四川湖三省兵征之。

二月進楊廷和吏部尚書武英殿大學士以兵部尚書曹元兼文淵閣大學士入閣辦事

正德中入閣不由翰林者三人楊一清以才望劉宇曹元皆阿附權奸得之

以劉忠爲吏部尚書兼翰林院學士掌詹事府事○出太監張永于南京不果行

劉瑾專政欲謀不軌慮永軋已一日伺間言于上調永南京奏既可即日逐永出就道榜諸禁門不許放永入永覺之直趨至上前訴已無罪爲瑾所害召瑾至語不合永卽奪拳毆之谷大用等勸解上令諸近臣置酒和釋

夏四月慶府安化王寘鐠反殺總兵官江漢巡撫都御史
安惟學

寘鐠者慶靖王曾孫也是時劉瑾擅權毒亂天下寘鐠
遂起逆謀告生員孫景文曰日者言我有帝王骨相覲
王九兒降鸚鵡神妄言禍福每見寘鐠呼老子寘鐠
益冀望非分會大理寺少卿周東度田寧夏倍益頃畝
畝索厚租徵馬屯租甚急景文謂寘鐠曰殿下欲圖大
事此其時矣寘鐠遂爲酒召都指揮何錦周昂指揮丁
廣謀反以誅奄瑾爲名是年四月五日寘鐠爲酒大會
巡撫安惟學總兵姜漢少卿周東鎮守太監趙弼弼及
漢至巡撫少卿辭不至錦等矯言虜入塞急呼壯士申

居於城廂執兵械跨馬呼噪儀賓歸廷璋等伏府序下
錦等趨安化府推門入序中伏兵起殺漢及弼遂走行
臺殺惟學都指揮楊忠又殺周少卿縛侯泰議放獄囚
焚官府劫庫藏奪河舟大索慶諸王將軍金幣萬計召
逆黨平虜城千戶徐欽引兵入城偽造印章旗牌又令
景文爲僞檄言瑾璽惑朝廷變亂祖法屏棄忠良收集
凶狡阻塞言路括歛民財籍沒公卿封拜侯伯數興大
獄羅織無辜散遣官校脇持遠近張綱劉棣曹雄毛倫
文臣武將內外交結意謀不軌今特舉義兵清除君側
凡我同心並宜響應傳布邊鎮以錦爲討賊大將軍昂
廣左右副將軍景文軍師張欽先鋒將軍魏鎮等七人

都護朱霞等十一人總管

逮瓊州兵備副使吳廷舉謫戍鴈門

廷舉初授廣東順德知縣。察已字民時。都御史屠濬召見廷舉。甚溫。廷舉請所事。濬曰。順德有大鎬某者。屬我修其家廟。縣令可理葺之。廷舉謝曰。令非有舊例。新恩一夫不敢役一錢。不敢費也。市舶大監出銀市葛。廷舉卽以銀市二葛。曰。奉此爲式。如不中。請還金。且葛雷產也。大監怒。取金去。汪御史惡廷舉。曰。彼專抗上官。市已能者。會廷舉壞淫祠。撤其材。作土堤。書院。賢館。修學宮。御史按而會其直。竹木碎計斤兩。廷舉囚服。措手。日詣訟所。士夫羣泣。訴其亡私盜狀。御史大慙。釋之。濬歷陞

左都御史入爲吏部尚書時廷舉爲令十年矣。漸猶卿之僅遷成都同知以憂去。起復改松江。上疏請修軍政。十八年廣東盜起。陞兵備僉事。討平十二村池州盜。正德二年。革兵備陞廣東右叅議。再逾月陞瓊州兵備副使。適逆瑾專權。廷舉發鎮守內臣潘忠二十罪。又奏有旨取省帑解京皆非正費。不曰進貢內也。則曰司禮打點錢賂瑾也。又疏便宜事。忠亦訐廷舉。瑾遂矯旨坐廷舉枉道。荷校不赦。鴈門再月赦罪還鄉。瑾誅。改雲南兵備副使。

四川巡撫副都御史林俊破賊於通江縣

四川賊藍廷瑞廖惠破通江縣。巡撫都御史林俊發官

兵及調。僱回石柱等處土兵。攻敗之。殺溺歿者六千餘人。生擒廖惠。其藍廷瑞奔紅口。與鄆本恕合。越過陝西漢中。三十六盤。至大巴山。俊復遣兵追及。大敗之。賊棄輜重走。

五月焦芳致仕。○以涇陽伯神英爲平胡將軍。起右都御史。楊一清提督軍務。命太監張永總督軍務。帥師討寘鐫。朝廷聞寘鐫反。遂命太監張永總督軍務。起致仕都御史楊一清。總制陝西延綏寧夏甘涼各路軍務。涇陽伯神英充平胡將軍。總兵官。統各路兵討之。一清與張永西行。一日嘆息泣謂永曰。藩室亂易除。國家內變不可測。奈何。永曰。何謂。一清曰。公豈一日忘情。故無能爲公。

畫策者。遂促席手書瑾字。永曰。渠日夜在上。傷上一日。不見渠不樂。今其枝附已成耳。目廣矣。奈何。一清曰。公亦天子信幸臣。今討賊不付他人。付公。上意可知。公試班師入京。詭言請上問語。寧夏事上必就公問。公於此時。上寔鑄偽檄。并述渠亂政。凶狡謀不軌。海內愁怨。大亂將起。上英武必悟。且大怒。誅瑾。誅柄用公。益矯瑾行事。呂強張承業暨公。千載三人耳。永曰。即不濟。奈何。一清曰。他人言濟不濟。未可知。言出公必濟。顧公言時。須有端緒。且委曲。上萬一不信。公頓首請死。願公上前。即退瑾。殺奴。餵狗。又涕哭頓首。得請即行事。無緩頃刻。漏機事。禍不旋踵。永勃然作曰。老奴何惜餘年報主乎。

寧夏游擊將軍仇鉞襲執寘鐸檻送京師

仇鉞以指揮使充游擊將軍。是時鉞陷賊中。京師訛言鉞從賊矣。又興武營守備保勛故與賊聯姻。亦遂疑勛爲外應。朝議用勛爲叅將。鉞爲副總兵。着率兵討賊。於是勛上疏言。臣母及妻子俱在賊中。臣義不顧家。恨不飛渡黃河。食賊肉以謝朝廷。鉞亦稱病卧。陰納游兵壯士。候保勛等諸兵至。從中發爲內應。俄而蒼頭書童沒河。潛入城。言保勛。楊英韓斌時源各率兵屯河上。廣武營都指揮孫隆焚兩壩。掃捲河舟。盡奪泊東岸矣。鉞喜。尚稱病卧。族人謂賊宜急守渡口。防夾河灌城。遏東岸兵。勿使渡河。何錦果率都指揮鄭卿等三千人出覘渡。

口留昂守城昂問鉞病。鉞猶堅卧呻吟。伏諸蒼頭候昂入。殺昂。鉞卽披甲仗劍跨馬出門一呼。諸游兵壯士楊真等聞之。卽趨安化府殺朱霞等十一人擒真鑄及其子台潛。遣古興兒密告鄭卿。令反正。遂殺魏鎮等十人。錦廣走。追擒之賀蘭山外。

六月京師旱。靈○秋七月四川威茂地震有聲如雷。漳川樂至州縣皆震。○八月真鑄伏誅。楊一清仍總制陝西軍務。

張永楊一清至陝西而賊已就擒。遂械真鑄錦廣等至京。頌繫真鑄於諸王館。錦廣等下錦衣衛獄。廷鞫伏誅。第真鑄坐黨廢庶人將軍鼎才。俘至京。旣論死。正德中。

山僧大千和尚者。富財凌同類。同類毆和尚。和尚憤曰。我皇帝家人也。衆異其言。聞于朝。逮至京。下刑部獄。和尚曰。我安化府龔才也。衆不能辨。安化宮人左寶瓶在浣衣局。召驗和尚。寶瓶叱曰。此龔才殿下。得免死。送高墻。竟不能知當時代龔才死者誰也。

劉瑾坐謀反。吏部尚書張綏。錦衣衛指揮楊玉石。文義等坐同謀。皆伏誅。內閣劉宇。曹元。前內閣焦芳。並削籍。

張永獻俘至京。遂與素所厚宦侍張雄。張忠等共訴于上前。謂瑾激變。寧夏心不自安。陰謀不軌。其形已具。宜早擒之。永因出懷中疏。奏瑾大罪十七事。上猶豫未決。永曰。少遲。我等皆爲齏粉矣。陛下安所之乎。上允其奏。

當夜命牌子頭往召瑾永等勸上親至瑾宅近地觀變
時漏下三鼓瑾方熟寢令牌子頭入問曰上安在對曰
在豹房瑾起披衣謂家人曰事可疑矣出門有牌子頭
數人執瑾就內獄尋有旨降劉瑾南京奉御諸大璫曰
如此彼若復用肆毒當益甚柰何張永曰有我在無慮
已而瑾上白帖言奴縛時封奴帑奴赤身無一衣乞與
一二敝衣蓋體上見瑾帖憐之令與瑾故友有百件永
始惧令科道劾瑾劾中多指文武大臣阿附劉瑾永持
疏至左順門付諸言官曰瑾用事時我輩莫敢言况爾
兩班官乎今罪止瑾一人可領此疏去易疏急進勿搖
動人於是科道官列瑾罪惡三十餘條疏入遂下瑾鎮

撫司獄坐奸黨律求輩又不欲止罪內臣一人乃逮文
臣張綵一人武臣楊玉等六人獄辭旣具綵上疏稱寃
盡發李東陽阿附劉瑾之事東陽大怒又與求謀不重
法誅鋤此輩後受其亂乃改謀反律瑾凌遲三日諸被
害者爭取其肉嚼之悉誅其家屬抄沒財產金二十四
萬錠又五萬七千八百兩銀元寶五百萬錠又一百五
十八萬三千六百兩寶石二斗金甲二金鈎三千玉帶
四千一百六十二束獅蠻帶二束金湯盞五百蟒衣四
百七十襲牙牌二匱穿宮牌五百金牌三裘袍八爪金
龍四盃甲三千玉琴一玉瑤印一顆以上金共千二百
五萬七千八百兩銀共二萬五千九百五十八萬三千

六百兩楊玉等六人皆伏誅張綵歿獄中乃暴其屬家
屬流嶺南綵在吏部惟知敬瑾共謀事諸大璫以瑾
之疎同類皆綵教之又楊廷儀爲宇腹心宇過吏部調
廷儀爲吏部郎中親信之及宇入閣綵代宇廷儀不爲
綵所親有所私綵不聽廷儀兄弟深憾之又故事吏部
推用大臣必密謀于內閣綵以爲事在于瑾內閣不得
與每忽之東陽等以爲遽廢內閣權共衛之及瑾被誅
亦捕綵下獄議以交結近侍符同奏啟斬罪過赦免歿
廷和等今改擬同劉瑾同反罪綵病歿獄中仍令暴其
屬然非真謀反也故流其母妻子第于嶺南不誅○大
學士劉宇曹元皆有罪免前大學士焦芳及子侍讀焦

黃中並除名爲民先是黃中爲檢討數月卽陞編修踰年復陞侍讀性尤狂恣無恥時土官岑濬沒入家口有姝姝色芳聞求於瑾得之納以爲妾後芳卧病黃中烝焉聚塵之鄙天下嗤之瑾誅言官交章暴其罪並褫職劉大夏韓文許進並復官致仕○奪神英涇陽伯爵復陳熊平江伯

成化弘治間神英充總兵官守寧夏延綏宣府大同歷四鎮累官署都督正德五年給事中歐陽劾英年老不任金革致仕是年賂瑾金寶萬計矯旨英居官五十餘年有戰功欲封英爵下兵部議尚書曹元阿瑾卽稱英功傳會盡錄上英前後首功中律瑾又欲竝衆口下廷

臣再議莫敢異同是年四月封英涇陽伯食祿八百石
與世券數月瑾敗言官交章劾英奪爵繳誥券爲右都
督○陳熊總督漕運劉瑾索金錢不得憾之遂以濕潤
米等項銀爲賍必欲寘之死地李東陽力爭之瑾謂熊
所犯罪重不宜姑息東陽曰某誠姑息非姑息陳熊乃
姑息陳瑄耳瑄在太宗朝開濟寧河道以通漕運有大
功金書鐵券子孫皆免死豈可盡革傷天下武臣心瑾
曰國初功臣如常遇春鄧愈湯和輩百戰之功今其子
孫俱已革罷陳瑄不曾廝殺有功當代豈足深惜東陽
曰漢高祖親定十八功臣位以蕭何爲第一蕭何不曾
廝殺但因供給餽餉不絕遂以爲萬世之功蓋足食然

後足兵使當時餽餉不繼雖百張良十韓信豈能切漢
餽蕭何餽餉猶是一時爭戰之功陳瑄通南北漕運每
歲四百萬石至京師誠國家萬世之利也瑾不答竟坐
侵奪民利奪誥券謫戍海南至是復爵

詔焚諸與瑾往返書劄文字

是時籍劉瑾家得秦府永壽王爲瑾慶壽詩序中間稱
謂過於卑誦上怒甚欲降勅切責李東陽上疏曰自古
治亂賊者正名定罪誅止其身昔漢光武平叛賊王郎
得吏民交通文書數千章不一省視會諸將燒之曰令
反側子自安歷代相傳以爲故事當劉瑾專權亂政之
時假托朝廷威福以劫天下生殺予奪惟其所欲中外

臣民誰不屈意待之徐來書信禮意雖於法律有碍但因畏罪避惡多不得已情有可原况王府懿親尤宜優待自非知情助叛法不可赦者其細故小過亦須曲賜包容若指論罪實降勅切責則凡有書信饋送者不知其幾傳聞驚駭各不自安或愧惧終身或遂致失所不可不爲之慮今劉瑾罪狀明白已正典刑伏乞聖明洞察廣大涵容將此壽詞置之不問并一應文書涉叛逆事情者并行燒燬以滅其跡使人心安帖事體穩當上以爲然於是悉焚其往還文字無延及者

論平寘鐫及誅劉瑾功

寘鐫之亂實由仇鉞反正而劉瑾之誅則揚一清之謀

也李東陽等奏言旬月之間二難交作悉底平定皆太監張永等之功而永亦自攘爲已有一時黨惡如谷大用馬永成陸閏魏彬皆冒以運籌仇鉞封咸寧伯永兄張富封秦安伯弟容封安定伯大用弟大寬高平伯大亮永清伯永成弟馬山平涼伯閏弟陸永鎮平伯彬弟魏英鎮安伯並食祿一千石給誥券世襲李東陽楊廷和各廕子一人爲尚寶司丞楊一清陞戶部尚書加太子太保廕子一人爲中書舍人南京御史張芹劾李東陽當瑾擅權亂政時禮貌過於卑屈詞旨極其稱贊及他人奏誅瑾則攘功受賞不顧名節東陽引疾辭不允命魏彬掌司禮監事

劉瑾雖誅而政權仍在內臣。彬既掌司禮監。決大政而馬永成等又奏有旨。凡朝廷大事。須彬等同議。瑾所行亂政。雖奉明詔。令各衙門查革改正。而其流毒尚在。彬永成等繼之。濁亂朝綱。賞罰乖宜。山東河南北江西四川諸處盜賊蜂起。而天下不勝煩擾矣。時張永欲矯劉瑾奢僭之弊。以窮苦魚菜四字爲題。索詩李東陽楊廷和等各作長篇以獻。東陽爲窮字詩。析點畫爲句。極工巧。永大悅。命工刊印傳之。未幾流賊殘毒中原。人以爲窮苦之應。

革寧府護衛○罷工部尚書畢亨。起曾鑑復爲工部尚書。畢亨請毀劉瑾原籍陝西祖墳。且云內官修墳不係舊

例宜悉革。罷魏彬等大怒曰。洪武禮制。豈有文官修墳例耶。遂矯旨。劉瑾祖墳不必拆毀。畢亨着致仕。

九月召南京吏部尚書梁儲爲吏部尚書。以吏部尚書掌詹事府劉忠並兼文淵閣大學士入閣辦事。○進楊廷和少傅兼太子太傅謹身殿大學士。劉忠少傅兼太子太傅。梁儲少保兼太子太保。並武英殿大學士。○以陶琰爲副都御史總督漕運。巡撫江北。○霸州賊劉六劉七齊彥名等作亂。

京師之南。固安永清霸州文安等處。京衛屯軍雜居其地。人性驕悍。好騎射。往往邀路劫財。輒奔散不可尋。人號爲響馬賊。正德間。內侍得寵用事者。劉瑾陝西興平

縣人谷大用馬永成張忠等皆霸州文安諸處人大盜劉七等嘗因內官家人混入禁內至豹房觀上游幸之所及爲甯果所逼遂聚衆拒捕瑾誅果亦得罪係獄當時若遣驍將五人各統勁兵一千分路而出聽其便宜襲捕惟以平賊爲功不論首級多寡不過旬月而平矣時兵部尚書王敞不通政務止行有司擒捕已獲齊彥名收安肅縣獄劉七等十餘人劫去旬日之間聚至數百所至窮民響應增至數千敞束手無策

冬十月致仕吏部尚書許進卒○十一月致仕南京國子祭酒章懋爲南京太常寺卿辭○陞傅珪爲吏部右侍郎○致仕禮部侍郎掌國子祭酒事謝鐸卒○二月尊太皇

太后王氏爲慈聖康壽大皇太后。皇太后。張氏爲慈壽皇太后。○致仕參議賀欽卒。學者稱爲醫問先生。

辛未六年春正月。改戶部尚書楊一清爲吏部尚書。召南京吏部尚書孫交爲戶部尚書。以喬宇爲南京禮部尚書。○巡撫四川副都御史林俊平江津賊。

四川江津賊曹甫作亂。僭稱順天秦王。攻圍縣治。殺分巡按察僉事吳景。都御史林俊調兵討誅曹甫。賊平。

二月起致仕副都御史邵寶爲戶部右侍郎。○二月。賜進士楊慎等三百人及第出身有差。○少傅兼太子太傅吏部尚書武英殿大學士劉忠以省墓還。尋致仕。

忠性峻少。通行方寡合。是春累疏辭疾。未允。強起主會。

試事事竣卽省墓。已得請陛辭去。上一日摘會試錄所刻文字差誤處以示李東陽。蓋中官有譖之者矣。忠抵家聞之遂疏乞休。

夏四月江西盜起。命右都御史陳金總制軍務。右副都御史俞諫提督軍務討之。

先是江西諸郡盜賊蜂起。贛賊犯新淦。執叅政趙士賢。靖安賊據越王嶺。礮寨華林賊破瑞州。旣而撫州東鄉。饒州桃源洞等處賊亦作亂。金等奏調廣西田州東蘭等處狼兵合征之。

章懋陞南京禮部右侍郎。辭致仕。○五月致仕。太子太保兵部尚書劉大夏卒。

大夏平生不以勢位自居。所至愛民如子。民亦愛之。如
父母。遇事有當行。未嘗先洩。有疑未明者。不以公移顯
行。雖屬官亦具手簡直述其事。紙尾書名。以故所委事
無大小無不盡心力。不相欺負。功名富貴子孫福澤。泊
如也。嘗預作壽藏東山陽記曰。予嘗見士大夫家子弟。
愛其父兄者。俟其身後。必求名儒大筆。鋪張行業以誌
于其墓。作國史者。或憊而來之。予無似。承祖宗世澤。竊
科甲官祿。前後四十年。在家在邦。無一事可述者。萬一
私所親謬言以誤名筆。縱可欺人。獨不自愧于地下也。
耶。用是述平生履歷。書而勒諸石。付兒祖生等藏之。以
俟他日。其詞雖俚。其事則核。予心安焉。大夏嘗曰。居官

以正已爲先所謂正已不特當戒利亦當達名李東陽
曰東山乃昔人所謂與物無競臨事有爲者也卒贈太
保謚忠宣

命惠安伯張偉爲總兵官副都御史馬中錫提督軍務帥
師討畿輔賊

劉六劉七齊彥名等賊勢日熾有趙風子名燧者霸州
文安縣生員有勇力好任俠先是劉六劉七劉三齊彥
名邢老虎楊虎等攻掠文安燧偕家屬避賊立水中賊
劫其妻將汙之燧怒奮往殺傷二賊爲劉六劉七所擒
因降爲盜於是燧與劉三楊虎邢老虎爲一夥分掠河
南劉六七齊彥名爲一夥分掠山東遂破泰安燒東關

攻萊蕪秋七月己酉朔千餘騎破齊河城燒官廨倉庫
殺虜莫計庚午千騎破高唐攻囚殺虜又三百騎破禹
城燒官舍及安仁新寨二居劫民辛亥七百餘騎
破東光燒殺虜掠壬子破吳橋燒官民居殺虜又千餘
騎圍夏津燒民舍千餘間分劫鄉村次日復攻城沿途
殺掠莫計甲寅三千騎攻南宮城燒官宇庫獄劫囚乙
卯千騎破新河知縣董昌戰傷丙辰攻冀州劫倉庫放
囚燒官民居擄掠吏部尚書楊一清建議推用大將征
討及文臣有才望者提督軍務乃舉巡撫大同副都御
史馬中錫提督軍務惠安伯張偉爲總兵官同征流賊
所領京營人馬皆不簡閱中錫書生欲効龔遂化渤海

盜事。招撫解散。張偉統袴之子。亦不知兵。既出兵。中錫遍檄諸路。榜示劉六等。經過所在官司。不許捕捉與供。飲食若聽撫。待以不灰。劉六等聞之。所至不殺掠。然見信且疑。中錫至德州。桑園兒駐兵。劉六等來謁。中錫開誠撫之。劉六欲降。劉七曰。今內臣主事馬老爺豈能自踐其言乎。潛使人至京。師探諸中貴。無招降意。又以山東所掠金銀輦載至京。饋權倖求赦不得。遂大肆劫掠。衆至數萬。

以巡撫陝西右都御史陳壽爲南京刑部尚書致仕。○起李夢陽爲江西提學副使。○調南京刑部主事王守仁爲吏部驗封主事。○名編修何瑋復任。

何瑋以長揖忤劉瑾調外任。乞致仕。至是調復翰林編修。

加洪鍾太子少保。陞林俊右都御史。藍章副都御史。

洪鍾以總制至四川。與林俊議多不合。軍城牽制。每不得速進討。藍廷瑞等招集散亡。勢復大振。攻燒營山縣。治殺僉事王源。洪鍾乃會林俊督四川兵。陝西巡撫御史藍章督陝西兵。及檄湖廣河南兵。分路進剿。鍾與俊親監督之。湖廣兵先追及於陝西石泉縣。熨斗塢賊見官兵追急。求招撫。令至四川東鄉縣金寶寺聽撫。鍾給榜示。并檄召廷瑞等約日出降。賊意在緩師。延至六月十四日。始至信地。依山駐營。廷瑞本怨俱不出。但使

人來言欲得營山縣治。或臨江市駐其衆方出見。且要
取旗牌官爲質。鍾等俱許之。鄢本恕來見。回營藍廷瑞
始復來見。且降且肆殺掠。仍於松樹埡劫擄民家。計欲
脫走。官兵分七哨。周匝防守。巡邏甚密。不得間。賊勢窘
漸潰散。十五日廷瑞以所掠女子詐爲已女。嫁與領兵
土舍彭世麟爲妾。以結驩。世麟白軍問受之。遂邀賊首
至營宴會。鍾令廷瑞所親鮮于金說廷瑞及本恕。於十
六日帥諸賊二十八人同至彭世麟赴宴。伏兵盡擒之。
衆聞變。遂大潰。四出奔軼山谷。鍾等遣諸路兵分道追
剿之。擒斬溺歿并俘獲婦女老弱騾馬兵仗甚衆。未盡
者許自投首撫之。惟從賊首廖麻子未獲。捷聞陞秩賞

賚有差

日本遣寧波叛民宋素卿來貢○巡撫四川右都御史林俊乞致仕許之

江津賊曹甫餘黨方四任鬍子擁衆走綦江入思南石阡等府數月之間復猖獗方四僞稱總兵任鬍子僞稱御史餘賊首二十餘人僞稱評事等名六月貴州兵敗之于思南播州兵敗之于三跳諸處先後擒斬三千餘人賊由貴州復入四川欲至江津復仇八月賊攻南川馬頸雀子崗等關官兵禦之又攻東鄉永澄潛諸處獮狍兵禦之賊遂越關入綦江境聲言欲取江津重慶瀘州叙州以攻成都遠近震駭林俊駐江津檄副使何珊

都指揮鄒慶帥兵由合江進副使李鉞知府曹恕帥兵由江津進夾攻之九月十四日賊攻江津會石碛兵至并力禦之賊敗走追至合小坪破其四營十八日賊以八千人昇攻且復攻江津俊遣李鉞曹恕督西陽播州石碛等兵分三道迎擊之賊敗追至高觀山斬首五百餘級俘獲二百餘人官兵乘勝追擊賊乃拒高下石兵不敢近二十日李鉞督諸將校分兵爲六哨由大埡小埡月埡關並進直衝高梁賊不能禦六面皆令破其中堅斬賊首汪顯子等賊大敗追殺三十餘里斬首一千八百餘級生擒方四妻妾俘獲幼男婦女三千四百餘人餘衆墜跌崖壑填塞筍溪等河三四里許奪獲驢騾

馬四千五百有奇。賊遁走。土兵乘勝追勦。又殺二百餘人。方四并餘賊二千餘人。俱遁入思南境內。捷聞。林俊等賞各有差。時宦官用事。各邊征勦。必以其弟姪私人。寄名兵籍。冒報功次。陞賞俊。一切拒絕不許。權倖惡之。且與總制洪鍾議論多不合。因乞致仕。疏上。忌者謂盜已平。內批。卽允之。臺諫疏留不報。蜀人號哭追送俊去。方四餘黨復熾。又賊麻六兒喻思侔。駱松祥。范藻等相繼倡亂。內江崇慶之境。騷然。踰年不能定矣。

改兵部尚書王敬掌通政司事。調刑部尚書何鑑爲兵部尚書。

時流賊日熾。言官論敞不職。遂改敞以鑑代之。

遷張偉馬中錫下錦衣衛獄

中錫故城縣人賊至故城戒令勿焚劫馬都堂家房屋財帛由是謫騰謂中錫恐賊害已私家玩寇殃民遺錦衣官校捕中錫張偉下獄論罪斬後中錫歿獄中張偉革爵閑住

冬十月賊破棗強縣知縣段豸歿之

丁巳劉六劉七齊彥名楊虎諸兇并集以二千騎屠棗強劫倉庫獄殺燒慘毒官民吏商歿者莫計知縣段豸歿之

命太監谷大用總督軍務兵部侍郎陸完提督軍務以伏羌伯毛銳爲平賊將軍充總兵官帥師討賊

先是馬中錫等討賊無功。中官遂謂此事非書生所能辦。乃以太監谷大用爲總督。侍郎陸完爲提督。伏羌伯毛銳爲總兵。兵部尚書何鑑又奏令陸完帶領主事田蘭等招募民兵大擾地方。又奏調宣府游擊將軍許泰卻永大同總兵張俊游擊江彬人征內地。俱聽谷大用陸完節制。令谷大用陸完居中於臨清。住劄當時所統兵萬餘。亦未簡閱。完本庸劣。銳已衰老。谷大用擁衆自衛。高坐堅城。行至真定所屬地方。遇劉七等交戰。大敗。損折官軍喪失輜重無算。且失將軍印。適許泰領兵至。挾援毛銳。僅以身免。

逮山東巡撫都御史邊魯。真定巡撫都御史蕭紳下獄。除

名

憲等撫馭無方遇賊失機故兵部奏逮二人下獄除名
爲民且著爲令凡州縣官被賊攻破城池比守邊將帥
例抵死

陞山東樂陵知縣許達爲武定兵備僉事

時流賊劉六劉七等狂猷方熾達預築城浚隍踰月而
成募死士十人人持大挺隨賊向往突擊人馬俱斃賊
不敢近境以功陞山東按察僉事整飭武定兵備

賊攻徐宿等州靈壁虞城等縣官兵及賊戰于白龍王廟
小黃河賊楊虎以舟覆歿

時游擊將軍許泰敗賊景州卻永敗賊阜城燧等奔蒙

山副總兵李瑾遇賊戰敗賊得我神器盔甲及蟒衣虎
燧衣蟒衣至沂州楊頭管四等處通等皆歸賊賊勢
轉熾破靈山衛及日照諸縣攻徐州不下至宿遷淮安
知府劉祥率兵逆賊不戰自潰溺水死者無算祥被執
縱還遂渡河擒高郵指揮陳鵬攻靈壁知縣陳伯安出
戰被執攻宿州不能破焚其西關欲降伯安不屈劉三
欲殺之燧止得釋攻破永城夏邑虞城盡焚居民執虞
城知縣釋之攻破歸德州守備萬都司率衆追至亳州
武平衛指揮石堅率兵千人僧兵三百人邀戰皆敗殺
僧兵七十人至白龍王廟渡小黃河顏兵營河上虎憤
率壯士七人奪船渡河與戰官軍以土石擊獲其舟虎

成燧等共推劉三爲主

鹿邑人陳翰降賊僞推劉三爲奉天征討大元帥趙燧爲副元帥翰爲軍師長史

太和官民潰散副總兵白王兵至劉三率五千餘人與戰殺官軍千五百人奪我神器七十攻破霍丘殺萬人執都指揮潘翀釋之殺都指揮王保至鹿邑鹿邑潰散執守城千戶有陳翰者自稱兵部主事乞爲劉三兒至新蔡致仕張知府率衆遺劉三金帛萬計得不攻當是時河淮南北官吏望風遁諸將利虜掠戰不力賊勢日盛燧劉三等妄欲舉大事與陳翰寘龍謀兵無主必亂共推劉三爲奉天征討大元帥燧更名懷忠稱副元帥

小張永前軍管四後軍劉資左軍馬武右軍邢老虎中軍並稱都督陳翰爲侍謀軍國元帥長史其餘皆有名號分二十八營應二十八宿各樹大旗爲號置金旗二大書虎賁三千直抵幽燕之地龍飛九五重開混沌之天又造鈞牌令所至官吏修道路橋梁備芻糧酒肉供軍逆降者秋毫無犯拒敵者寸草不遺

十二月命右副都御史彭澤提督軍務以咸寧伯仇鉞爲平賊將軍充總兵官卽延綏榆林諸路軍馬討賊○賊破上蔡縣知縣霍恩歿之遂破西平縣知縣王佐歿之復破裕州同知郁采歿之

賊至上蔡知縣霍恩指揮李某拒守賊破其城殺霍知

縣殘其尸至商水知縣降至西平。知縣王佐拒敵被執。罵不絕口。賊支解。死。至舞陽。破其城。劫庫釋囚。囚有僧德靜。僞稱唐府宮人。子因留之。至葉。執知縣。唐天恩及學官釋之。俄爲諸細賊所殺。攻襄城。襄城人饋銀馬。不攻。攻破黠縣。僉事孫磐。齊黃榜撫賊。燧復書曰。羣姦在朝。舞弄精神。濁亂海內。誅殺諫臣。屏斥元老。乞皇上獨斷梟羣奸之首。以謝天下。斬臣首以謝羣奸。營中見撫榜。逃者百餘人。賊有掠縣令妻子者。燧殺之。攻破格州。殺都指揮詹濟等數千人。劫庫釋囚。唐王遣人謂燧曰。德靜非我子。任若等殺之。攻唐縣。不能破。餽賊鞍轡二十副。燒民居去。

以禮部尚書賈宏燕文淵閣大學士入閣辦事○加楊一清少保兼太子太保○陞吏部左侍郎傳珪爲禮部尚書時吏部尚書楊一清方得時名士皆趨附善招援外號秉直陰實樹黨通餽遺珪數爭其不公一清不堪越次陞禮部書實達之也時東陽與一清各相結托而東陽婿爲儀制郎中前尚書遇郎中厚恣其爲嘗呼其字而不官珪乃因其廢法數咎責其吏胥郎中求遷他曹避去○上方好佛自名大慶法王外廷無敢諫會番僧奏討田百畝爲大慶法王下院珪因劾僧曰法王何爲者至與尊號並例大不道當誅有詔不問其妄求亦止優人臧賢者有寵頗能軒輊榮辱人精神或趨附之因請

改牙牌製如印文爲方者珪不可名老優更事者詰曰爾優敢亂法爾寵可常保否果爲此爾禍無旣矣優乃戢而聽命

陞孫需爲南京工部尚書○以蔣冕爲吏部右侍郎壬申七年春正月黃河清自清河至柳江浦清五日○召毛銳還

毛銳敗績於真定罷其總兵名回京以與谷大用同事遂不問其失律喪師之罪但令其歸第而已。

陞提督軍務兵部侍郎陸完爲右都御史

先是楊一清建議有能擒斬盜賊三名顆者陞一級時劉六劉七齊彥名等雖擁衆數萬然多擄掠脇從之徒

其親信驍勇善騎射者不及千人。官軍每追及賊首驅
脇從良民與官軍對敵。并棄所掠財帛奔逸而去。官軍
爭取財帛及斬獲脇從首級。屢報捷音。降勅獎勵。論功
陞賞。谷大用陸完得獎勵十餘次。前後報功萬計。而正
賊無一獲者。甚至賊已過而官軍遇平民亦殺之。以報
功。大同游擊江彬過冀州。人人家殺二十二人。有司申
狀。谷大用陸完皆不問。大用等復奏帶權勢子弟僕從
數多。坐冒功級。日費廩餼。自出師。芻糧獨當至費太倉
銀二百餘萬兩。府庫爲之虛耗。

前少師吏部尚書馬文升卒。

是年文升卒。年八十五。贈太保諡端肅。文升立朝五十

餘年以身殉國不避艱險凡有大議衆莫敢決文升至一言而定性介埒寡言笑不苟華嚴舉止嚴重修髯偉貌望之知爲異人居官重名而無偶雖位極人臣名聞夷夏退然不敢自居至於直事交臨利害屹然如山不可搖奪

遣太監陸問監鎗督諸軍討賊。羅體邵尚書傳珪時聞以陸主事計賊未有成功乃立監鎗名謀出統軍命下多訛議可不衆惧忤中貴意觀望依違不決珪奮然曰今兵老民疲直以冒功者多致失軍士心賊勢方熒民譁然思亂禍旦夕及宗社吾儕歿不償其諸公唯唯將何待乎明日竟遣問監鎗傳旨令珪致仕

江西南昌知府李承勛擊破華林賊遂擊馬礪束鄉等寨賊皆平之

時陳金檄副使周憲等分兵三路討華林賊憲帥兵進其二路兵失期不至憲與賊戰獨深入山谷峻險賊憑高發插石下兵敗憲被執歿之子泮從征見父被執躍馬前救之中流矢歿賊勢大猖獗事聞朝廷贈憲官謚忠愍仍旌其子孝烈乃命給事中黎奭往勛功罪金檄按察使王秩南昌知府李承勛督兵勦之勛招有降賊黃竒寘麾下智畧任用之人謂勛宜防不測勛益親信令宿帳中竒感奮誓以歿報勛乃令竒入賊寨說其黨多來降者與約期令俟報至期承勛令士酋入

選精兵五百人夜具俱至山下勅令黃奇密入寨誘所
與約降者來既見復縱之去令爲內應勅乃與猛帥五
百人夜啣枚登山至重險上黃奇與數人前導至壘羣
賊方解睡直夜者擊三更奇拔柵帥衆入五百人奮力
斫之內應降賊亦合勢夾攻賊倉卒不知所爲求甲仗
皆不得斬首三千餘級餘衆奔出壘乘夜逃匿山谷俟
曉搜諸山又斬獲千餘人華林賊遂平於是移兵擊礪
礪寨東郡賊皆平之

二月賊掠襄陽破泌陽官軍及賊戰于西平大敗之
邢老虎病歿趙燧等併其衆十二萬騎五千轉掠襄陽
樊城襄陽隨州新野破泌陽前大學士焦芳僅以身免

盡發其先世冢墓無遺骸取芳衣冠被庭樹歷數其惡
命劍士斬之曰使吾手誅此賊天下進攻鉤州不
克賊常聲言欲屠城趙燧以馬文升家在園中引衆去
之至西平與官軍戰大敗賊死二千餘人奔鄆陵焚掠
而過至新鄭鄭州攻城不能入遂至滎陽圯水破其城
至偃師遇姚總兵夾河而陣燧率衆過河我軍潰散殺
毛葫蘆百餘人

延綬榆林官軍及賊戰于河南大敗之追至六安定遠賊
復敗

賊至河南府遇榆林官軍迎戰賊大敗官軍追至河劉
三奮勇殺都指揮及其下四十餘人至汝寧遇湖廣土

軍又殺上軍數十人。駐未畢，鎮官軍追過河，與劉三戰。我軍敗，賊至六安州。官軍追殺五百人，至定遠，賊又敗。復至六安，劉二率衆萬餘人走高城。

賊寇邳州。知州周尚化等拒却之。

是年春正月丁未，明劉六、劉七、齊彥名自文安而下，所過殺官兵，劫倉庫，掠婦女，備極慘酷。二月甲申，至宿遷，屯小河口，欲劫船而渡。指揮周正禦之，不能前。退往桃源，屯于城子河。辛卯，劉六、劉七、齊彥名及毛老人等一萬七千徒掠邳州之加口集，遂由贛榆過郟城。辛丑，復擁衆寇邳州，去城二里許駐營。賊背白衣，彌滿郊野，以八百餘騎三面薄城。官軍遏其隘，施弩礮，賊退。

周城及外土城水口通賊路處知州周尚化等提兵拒守賊拔營踰距山去彥名黨劉宗禮來降至城下解甲曰陳云本霸州人充騰驤右衛勇士與兄宗義被掠皆不肯爲賊用常被撻又言近有河南楊虎餘黨遺書欲來合羣共犯南京等因

夏四月官軍與賊戰于嵩淺坡古縣集大破之賊馳至河西務復越臨清而南

三月壬寅彥名等二萬餘徒屯於扶溝之南關以二百餘騎掠本縣之五口癸卯六七等過呂梁燒丁部分司巡檢司房村驛民房艦皆作煨燼殺稅課局大便崔綸餘殺死者無筭甲辰官軍破賊於滕之呂孟社斬首九

百賊敗趙徐官軍追襲三月巳酉師集于邛之郭冢莊探賊屯馬古城營夜半師行庚戌旦遇賊衆五千官軍奮擊賊相却且戰且走至魚頭集破之斬首百五十有奇奪回虜衆數百癸丑賊自劉馬莊東奔登州海套雖屢衄隨所在脅聚寡而復衆四月初河南賊來寇定達六安哨騎亦躡巢穴賊偪陵寢丁丑官軍與六七彥名等大羣遇於嵩淺坡古縣集等處諸軍奮擊鏖戰大破之斬首二千三百及傷灰者三千有奇俘百有奇而逃散又千餘諸酋渠殆盡六七彥名獨挾三百餘騎皆極驍猛潰圍而逸間遁馳至河西務其勢無前京師發兵皆出莫能禦賊復越臨清而南庚子至邳之新安迤邐

馬家淺雙溝頻欲渡不得癸卯復出靈壁西南而去

夏五月武昌軍趙成擒趙燧檻送京師伏誅

燧欲還六安適管事張通率二千來歸至潁州楊虎下
廸卽二千餘人又來歸至鳳陽投書叢蘭都御史約降
不果屢與官軍戰敗陳翰遂降于仇總兵劉三被射死
燧知事不成至應山奪度牒削髮詐爲僧且投江西賊
覓渡舟遇武昌軍趙成擒之解京伏誅

閏五月賊殺湖廣巡撫都御史馬炳然

五月丁未賊劉六等渡棗林庚戌夜渡邳纔三百人遂
奔河南從光山確山奔上湖廣棄馬登舟沿江掠聚其
黨復盛至七百人己丑賊至陽邏圍風丙寅湖廣巡撫

都御史馬炳然攜家赴官賊遇之於爛泥鋪脅與俱至南京馬怒罵之遂遇害虜其家人既而劉六爲風折檣擊歿於水其幼雛數人亦歿唯劉七彥名泝流劫掠賊沿江東下犯鎮江通泰等處退棲狼山復溯江西九江安慶等處仍東下掠常州江陰等處再泊狼山

閏月己丑劉七彥名等與衆東下突來瓜州殺掠過壩泊於通州之狼山常熟之福山港遂凌駕江面縱橫山下通泰如臯京口濱江之區咸被創殘六月朔日以後劉七彥名在江不安舟居日上通州游掠與其黨韓三等謀得馬竄亂淮北海州辛亥乃募海門而上甲寅復越瓜州過南丙辰過采石泊蕪湖之月子河庚申在海

師

門之東。七里港謀入海。由張網海口深入裏河不果。又泊隸上。乙丑在斷腰遂自湖口縣乘風而西。寇南康。迤邐斬黃。登光州。因始還。泛九江。安慶。七月己卯至石灰河江口。遂往銅陵。時陸完自臨清馳至江上。都御史張縉王鎮叢蘭俞諫及副總兵時源各分兵守要害。賊復沿江東下。越瓜州。蹂周家橋。歷孟瀆下港。掠常州。殺常州守李嵩。遂犯江陰。殺縣丞余凌雲。丁亥仍泊狼山下。八月颶風大作。賊劉七溺水歿。齊彥名爲游兵所誅。遂旋

劉七等仍泊狼山下。其黨以失地利相尤。或潰逃去。劉七與其妾丁氏阮氏競二婢。乘劉醉。逸入通州。守兵執

之丁丑賊令狼山寺奴持書來索婢不與遂率衆二百餘來攻我軍擊之敗退入船是夕太風發舟數掀播晝夜不息風烈甚數十年所無賊船皆解散飄墮僅存八船其衆顛踣不支賊在船不能坐臥自相擊撞嘔泄臭穢狼藉互相怨詬已有自戕之謀蘇人有應募獻計用火攻其名水老鴉藏藥及火於礮矢中發之又爲具形如鳥喙持之入水以喙鑕船而機發之以自運轉轉透船可沉試用之已破一船乃米舸不曾傷賊退將復爲之賊檢察知之謂江南兵能水中破船是神兵也益駭絕乃登山團聚或下崖散遁輒爲通州諸處守兵所感通州最與賊切密而守吏亦特嚴整壬辰夜三更副總

劉暉帥遼東兵千總官任璽帥大同兵游擊卻永帥宣府兵與諸從校並進癸巳與守兵齊集未刻與賊戰我軍聲震天風火交熾賊披靡躋山顛古垣馮高控險鎗矢瓦石雨下鏖戰賊初不識山路火勢旣偪僧行居人逸出賊或從之上下得路而我軍方奮勇四前日加申劉副總引其部將張椿蕭澤高雲李春美饒徵等誓必決戰分軍爲三劉在山北卻在山南皆戴盾跣行而上手施鎗礮且上且攻盾上矢集如蝟將士有被數箭斃數人者不退遂奪其垣賊墜崖斃者無數其餘先已具舡艫山下以備竄逃至是覓嬰谷下山欲上船而船中人已滿不容入進退無地劉副總兵列崖下百矢齊

發官艦中驟矢并集劉七勢急遂赴水而死彥名爲宣
府游兵十旗張鑑取首劉副總兵擒斬餘賊截沉水
賊級有逸而北者高雲追斬之皆盡已夜息兵甲午旋
師

論平流賊功封太監谷大用第谷大寬爲高平伯陸閭弟
陸永爲鎮江伯成寧伯仇鉞進封爲侯陸完加太子少保
取回院掌事周李東陽楊廷和梁儲費宏各廕一子爲
錦才錦正千戶

其餘權勢所托奏帶之人以首級論功陞授都督錦衣
都指揮千百戶者凡千餘人大抵正德年間各處軍功
之濫其弊有三奏帶之數太多紀驗之次失實武選之

法盡壞鎮守官奏帶例該五名今則領兵奏帶至三四百名者有之徃徃安居京師寄名邊方故有一人而數處奏帶一時而數次獲功其不在斬馘之列又復巧立別名或曰運送神鎗或曰齎執旗牌或曰衝鋒破敵或曰三次當先或曰軍前效勞紀驗之地既無審覈之公銓選之司又無駁勘之實其改正重陞併功加授之類私謀巧術弊出百端難以枚舉

冬十月進楊廷和少師兼太子太師華蓋殿大學士梁儲少傅兼太子太傅謹身殿大學士費宏太子太保武英殿大學士○召邊將江彬等入京師

江彬蔚州衛指揮使驍勇狡險狠忍不可測時從宣府

總兵官張俊征流賊于山東善戰頗有功班師入京賂
錢寧引入豹房得見上彬機警善迎人意上喜留侍左
右時出奸謀蠱惑陞左都督冒國姓爲義兒時時在上
前講說兵事因請盡調遼東宣府大同延綏四鎮精兵
入京操引入大同操練統外四家又罔上振耀國威創
西官廳爲都督○上欲調邊兵遣司禮監與谷大用同
至內閣議行李東陽等力辨以爲不可府部科道交章
諫沮不聽復遣司禮監文書房官至閣促令擬旨乃上
疏曰臣聞有敝密計者託言京軍不習戰陣欲調宣府
邊軍三千入衛京師而以京軍充數戍邊每歲春秋番
換臣惟京邊官軍各有分地必有急事乃可互相應援

今無事而動一不便也京軍備邊不習戰陣難保必勝
恐損國威二不便也京軍出外倚恃強勢舌住房屋索要
免驚疑三不便也京軍出外倚恃強勢舌住房屋索要
錢物需索酒食強買貨物姦污婦女將士護短而不肯
禁邊方受害而不敢言四不便也邊軍在內狎恩恃愛
傲睨軍民蔑視官府小則怠玩大則違法治之或不能
堪縱之則愈不可制五不便也遠達鄉井拋棄骨肉或
風氣寒煖之不相宜或盤費供給之不相續六不便也
糧草之外必用行旅布帛之外必須賞賚非緊急不得
已之時爲糜費無紀極之計七不便也往來交替無有
寧息倉卒之際或突起于道途厭倦之餘或患生于時

腋八不便也。示京營之空虛。見國中之卑弱。九不便也。西北諸邊。見報聲息。唇齒之地。正須策應。脫有疎失。咎將誰歸。十不便也。凡此一事。五府以爲不便。六部等衙門以爲不便。六科十三道皆以爲不便。臣等居輔導之地。若阿諛曲從。則獨當誤國之罪。萬死不能塞責矣。翼日竟以內降傳旨行之。

十一月罷四川總制洪鍾。以右都御史彭澤總制四川軍務。

時麻六兒等賊久不能平。巡按四川御史王綸劾鍾縱寇殃民。故以不職罷。

十二月內閣李東陽致仕。○致仕都御史艾璞卒。○癸酉。

八年春二月以儲璫爲南京吏部侍郎卒○真帖木兒還吐刺魯番

七年冬令哈密三都督奄克孛刺寫亦虎仙滿刺哈三送真帖木兒西還春二月三都督至哈密奄克孛刺不肯去寫亦虎仙滿刺哈三送至土魯番

江西桃源崗賊執叅政吳廷舉尋討擒賊酋以出

時桃源賊作亂數年費以萬計而賊益熾廷舉自雲南副使陞江西叅政發憤欲設謀平賊乃徃撫諭解散反爲賊所留劫以威不爲動久之伺得賊中要領誘其左右有謀勇者使執賊酋以出遂率官軍進討

夏六月陞王瓊爲戶部尚書○江西桃源賊平總制陳金

奏立東鄉萬年二縣分治地方撫安人民

桃源賊聞官兵至頗惧議降按察使王秩欲受其降已有納款者議者以賊反覆不可信欲乘兵威撲絕取來降者殺之賊遂大亂棄巢寨奔突四出衝掠徽州衢州等處皆爲官軍所擒地方以平

秋八月拜牙卽叛降上魯番滿速兒遣人誘哈密

拜牙卽淫暴欲與奄克孛剌叛中國徃土魯番奄克孛剌不從自哈密奔肅拜牙卽棄城走入土魯番滿速兒令頭目火首他只丁與寫亦虎仙滿剌哈三入哈密取金印火者他只丁又令哈密都指揮火者馬黑木等至甘州索賞哈密諸酋譯書言拜牙卽棄國從番乞卽

月令集 卷二 四
差人守哈密巡撫趙鑑謬謂蒲速兒忠義令火者他只
丁寫亦虎仙滿刺哈三守城勤勞差撫夷官送土魯番
諸酋金幣二百撫夷官纔至哈密蒲速兒率眾亦至分
據刺木等城真帖木兒又言河西大饑窘人歿亡且半
甘州城南黑河可引灌城于是蒲速兒及火者他只丁
牙木蘭虎力奶翁寫亦虎仙滿刺哈三日夜聚謀侵甘
肅番文索金幣萬萬還我哈密否即插旗甘州門牙木
蘭者本我曲先人與寫亦虎仙等專伺我虛實外挾強
番內要厚賞自京師至甘肅徧置奸細巧爲交結肆行
反間然亦專與哈密爲讎未敢窺嘉峪關也

冬十月虜入宣府寨○以都督朱寧掌錦衣衛事

寧本內臣家人。姓錢有寵於上。賜以國姓。

復立皇莊五處

一在昌平州樓子村。一在靜海縣衛河兩岸。一在清縣孫兒莊。一在安州驢馬廟。一在清苑縣閭莊社。